



萬載縣志卷十九

名宦

祀典列名宦復爲立傳所以表其實也祠非題請奉

勅不得祀若傳則有功德於民皆得據實蹟表懿美固與人物各傳異名而同例萬雖褊邑賴良吏拊循久矣宋以前志載闕畧茲輯舊志并采史集諸書擇其政績尤著者列於篇近代司牧亦稍附焉旂常竹帛千載同馨後之覽者亦可奉爲前事之師歟撰名宦志

齊

嚴植之字孝源建平秭歸人齊永明中起家爲廬陵王國侍郎

建武中遷員外郎散騎常侍尋爲康樂侯相在縣清白民吏稱之天監二年板後軍騎兵參軍事

采梁書本傳補

按隋書百官志諸公已下臺爲選置相掌知百姓事則相

卽令長也

縣爲國曰相大縣爲令小縣爲長

侯不之國相代治其食采而

納其貢稅焉康樂相史志缺畧僅得嚴孝源一人今據史補傳其長史劉濟重孔奐二人見於晉書陳書者復無在縣事實於秩官補之不另立傳

後唐

辛開宣字敷謨號介岐山西孝義人唐天祐四年進士後唐長興二年官萬載勳勳保釐任誠守廉嘗語人曰官秩何論崇

卑祇期上不負君下不負民耳民咸戴之以疾卒於官葬龍山下子以兵亂道阻遂家萬載

按唐書百官志縣令下止有丞簿尉無所謂幕幕係宋代官名舊志名宦云任幕官官師云幕卽尉誤矣府志邱墓稱南唐進士注引通志載塚廟記云長興二年由進士爲萬載幕官秩官又以爲南唐縣尉長興在南唐之前尤誤今查文獻通考天祐四年進士二十人諸科二人舊志稱天祐進士本屬有據特所任何官吏志失傳不當鑿指耳乃塚廟記又云宋辛棄疾其後裔舊志踵其謬遂摭及仲甫次膺質之宋史世系各判今悉刪薙之

宋

晏防字宗武臨川人晏殊之姪也寬厚好學安於義命不可榮

辱主崇仁簿遷萬載丞行李蕭然遣家奴致米乃得歸赴調

卒於京 采宋史補

徐升字公允豐城人進士宣和間任主簿值凋殘之後墾田六

千餘頃公私交裕遷盱江丞累遷知蘄州安定郡王令疇鑒

裁甚高稱其作邑以詩書宜民冰雪自守罷官不持一錢 采

府志參豐城志補

方南卿字明夫靖康間上時弊方畧補大冶縣尉改萬載以捕

盜功遷知德安 采饒州志補

徐昇紹興二年知縣事先是金人陷豫章叛將杜彥率眾焚劫

邑為曹成馬友所據昇莅任時潰寇劉忠張成蟠泊山谷民

不聊生昇乃乞師討平之重建縣治招復流離境賴以安崇

祀名宦 舊志參修縣治記

張祖順字和卿四明人紹興間任縣尉有盜竊發躬勒部伍禽

得之念其窮無衣食而致此以為案問自首盜得不死改龍

游令累遷知梅州 采攻媿集補

范如璋字仲達 一作伯達建陽人紹興間知縣事行保伍法奸宄無

所容每有疑似之人保伍必互相傳送至縣驗其無他方令

出境訖任滿無一盜後朱熹求得其法於袁守張定叟且曰

此人有心力自來言保伍法未有及之者

宋福建通志補

按嘉定志如璋創保伍取回筠州義倉赴召知廉州

祝勛三衢人淳熙申知縣事時學官爲監市所居學官生徒皆

寓古寺勛乃恢復舊址一新之崇祀名宦

舊志參通志

錢文字文敘崇德人進士初爲當塗縣尉捕獲私貨茶商數十

人法當進秩力辭之淳熙申知萬載有異政能聲益著趙汝

愚薦可大用不果除知循州官至朝奉大夫

舊志參萬姓統

譜

王僎紹興人嘉泰二年知縣事心計詳明善於關防滲漏故賦

之已虧失者皆復舊額縣治庠陋撤而新之發豪民易谷梁

之惡逮赴詔獄奸猾屏跡崇祀名宦

舊志參嘉定志通志

林景達福州人嘉定間知縣事政尙誠信民不忍欺決事得情

嘗臥病民皆祀佛以禱竟不能起邑人哀之臨終戒其子曰

我瞑目後切不可聽吏人語妄破官錢其清潔如此崇祀名

宦

舊志參嘉定志

冷應徵字公定分寧人進士淳祐初以范應鈐薦知縣事大修

學舍招俊秀教試之旌其通經飭行者以勸歲饑下令收養

棄孩棄之者不得復問全活甚多葉夢得

一作

知袁州列其

治行以勵他縣崇祀名宦

舊志參府志

鍾季玉字之純德興人

宋史作樂平

進士淳祐間知縣事興學飭政

李廷芝薦於朝後爲秘書丞死節

采宋史參德輿志補

明

趙中字允中懷寧人洪武初知縣事當紅巾殘毀之後城中不滿百戶勞來安撫民爭歸之致七百餘戶遂置坊廂縣廳黉樓廟學皆其所建崇祀名宦

舊志參通志

賈志通淮安人洪武初知縣事寬裕愛民先是趙中建廟學未備志通捐俸倡民協成之生徒課程躬自稽督秩滿去士民

懷思不置崇祀名宦

舊志參府志

束清丹徒人舉人才洪武間知縣事慈孝廉明儉以自奉貧民逋租不能償者清鬻衣帶悉代完之崇祀名宦

舊志參一統

志

舒仲誠貴池人太學生洪武間知縣事爲政嚴明處斷平允招徠逃亡勸富室貸以種穀農具僦以房舍勿收其息民翕然歸之嘗朔旦謁廟里婦有篝燈晨績者資之粟布由是相勸以勤擢湖廣按察司僉事崇祀名宦

舊志參通志江南省志

董匡番禺舉人永樂間任教諭風儀峻整學問賅洽與諸生講論極其婉摯不以師位自尊尤工吟咏搢紳多推重之擢浙

江道監察御史

舊志參府志

張暉公安舉人宣德元年任訓導樂易誠懇博通經史勤於啟迪及去生徒相率餞送有揮淚者

舊志

李璟沅陵舉人宣德間任教諭學富品端有就正者不索挐餽
士甚感之

舊志

汪悠久餘姚人太學生宣德間知縣事法制嚴整洞察隱微先
是邑逋賦有至六七年者民逃亡過半悠久至爲奏免之鄰
境寇燄日熾百計堵禦民以安業崇祀名宦

舊志參通志

張受才寧化人吏員宣德間任縣丞清廉勤慎先是徵科無紀
吏緣爲奸受才於里分設甲總以便稽核又於便地置倉屯
歛以時轉運耗費悉定規則自是賦稅均平去日單騎隻輪
所藏惟書畫筆札而已民有護送至家者

舊志參府志

李燦福清人進士正統間知縣事實猛得宜訟獄屢空每朔旦

詣學勉勵諸生寬其徭役士翕然向學都御史韓雍以廉能
薦陞衡州通判崇祀名宦

舊志參通志

周濟大治人監生正統間任縣丞佐政有方法舉情達人無私
議修葺公署祠廟橋梁弗糜弗擾藩臬交薦擢用尋以制去

舊志參府志

施琦正統間任縣丞盡心職務不以可否事爲嫌邑水險峻兼
陂堰梗流賦運常苦覆溺琦請定每稅一畝科徵本色米五
升二合餘折徵銀布民甚便之

舊志參府志

劉頤涪州舉人景泰間任訓導識量宏遠爲諸生講授經義每
夜分不輟貧者并助給薪水士佩服之

舊志

邢廷禎金華人成化二年由廣州經歷擢知縣事明敏平恕撫恤勞獨尤倦倦焉民苦餉官馬力請於公府言其不堪民始免累崇祀名宦 舊志參通志

陳璨海陽舉人成化間知縣事字良擊奸積粟賑貸營學校葺廨宇建橋梁每遇早潦虔禱卽應時有雙虎噬人璨爲文禱於城隍神虎竟遁跡咸以爲異政所致云 舊志參祥異志及府志

喻淳高陽舉人成化間任教諭先是邑乘未有梓本撥拾紛紜不足省覽淳莅任九年博采廣詢刪繁補缺釐爲四帙鈔版以行後修志得所祖述淳之功也 舊志參原序

陳瑤字仲華全州人進士成化間知縣事持已廉而愛民惠在法恕而釐弊嚴勸農興學訟簡徭清陞監察御史厯官至都御史崇祀名宦 舊志參通志

黃琪永興人進士宏治初知縣事裁決如流庭無稽訟修學宮範祭器招懷流徙儲穀備荒練兵弭盜皆善政也薦擢刑部主事陞江西按察司僉事 舊志參湖南省志

朱憲山陰舉人宏治間任教諭性坦白訓諸生以經學爲要人咸奉爲卒業師以秩滿去後厯官南康同知 舊志參府志

顧英字順申慈谿人進士宏治間知縣事大姓多匿田英爲清版籍不貸豪右齊民輸賦如歸陞南京御史四川建昌兵備

副使 采萬姓統譜補

羅聰桐廬人歲貢正德間任訓導操履清慎待諸生恩義兼至貧不能自給輒捐俸與之卒於官有送柩至數程者 舊志參

府志

吳蒙崑山人歲貢正德間任訓導每月課藝親爲點定聞善若出諸已尤磊落多義舉致仕後督學周來袁與之同里諸生拜問風耗知其行誼終始如一云 舊志參府志

陸璫蘭谿舉人正德間知縣事多惠政巨豪數爲盜璫雍獮之富戶欺官誣民璫痛抑之值歲饑多逋賦檄催蝟集璫卽自就械繫民咸願身代璫曰父老毋自苦吾寧以此去官不忍

爾輩流離也勸課生徒撫卹孤寡皆極盡心後竟以謗調民

哭送遮留思慕不置崇祀名宦 舊志參通志

林同字宜正號龍峯晉江舉人正德間任教諭嘗從蔡清遊學有指受故其教人尤嚴義利之辨剛正不阿諸生暨所交遊懷回邪者望之竦然或因而改圖焉督學邵重其行甚獎異之壬午充湖廣分考明年陞金華府教授 舊志參府志福建

省志

林山字士仁長樂人進士嘉靖間知縣事政尙簡易民無苛擾行量田法民甚便之以最擢戶部主事後知徽州府 舊志參

福建省志

胡文光黟縣人進士嘉靖間知縣事詢瘼察隱善政甚多迎春亭養濟院南儲倉皆其所建中丞劉光濟疏薦於朝加秩留任復念民艱食起立社倉於澗田櫛樹潭進城牟村等處各豎巨版四城南豎巨版八勸民實粟其中歛散以時水旱有備民甚德之采修社倉記補

王廷稷字民育晉江舉人嘉靖間任教諭醇厚好學清約自守課諸生分俸以給筆札擢四川營山令歷官雲南右叅議舊志參福建省志

徐一唯蘄水人進士隆慶間知縣事沈毅果決置學田以贍師生定瀏陽豪戶爭廣洞田地之亂禱大圍山巨寇李大鑿等

民賴以安爲立生祠陞南京戶部主事崇祀名宦舊志參通志

伍可受清流人進士知容縣度田定賦馳檄平岑溪蠻擢南禮科給事中彈劾輔臣許國降萬載縣丞恬然安之無遷謫牢騷態惟以詩文自娛著有謫居草居一年起開封府推官歷官山東參議舊志參府志福建省志

鍾萬祿號贊士清遠人進士萬曆間知縣事廉勤並著清積逋禁私宰緝盜賊服水莽者嚴治之斃則押令自殯葬先是上高高安浮橋守者多訛索舟子病焉萬祿申請上憲勒石永禁以調繁去後陞戶部主事官至副憲舊志

畢懋良字師臯一字見素歙縣人進士萬厯間知縣事屢接瀏陽民苦公賦多逋逃懋良捐夙負給牛種使得墾荒民稍稍還集念南糧解戶賠累僉南布茲解就所發布價營息以紓其力他若立社倉革火耗裁樣鹽禁差船課士修學皆善政也居官淡薄自奉日惟食豆粥家人不堪懋良曰若不官安所得食家人化焉秩滿陞禮部主事累陞戶部侍郎總督倉塲崇祀名宦

舊志參通志江南省志

倫應祥西寧舉人萬厯間知縣事政尙嚴明力鋤強暴峻訟者必多方殄除之值洪水米價騰貴應祥便宜行事即將南米發糶置搬運射利者於法戕民得甦臺薦擢知蘄州崇祀名宦

舊志參通志廣東省志

姚繼舜號虞廷桐鄉舉人萬厯間知縣事性恬淡不以家隨一切刑杖奉父命悉從輕省命案必詣城隍祠勘詰先是邑服水莽者眾繼舜命各處剷去其根并延僧懺度自是少息歲饑設賑痢疫施藥皆出於捐俸全活甚多勸農息訟嘗書一聯於門曰鄉井有田宜早種縣庭無事莫頻來葺學宮修預備倉建康樂橋復買田爲修橋費往來者德之立有生祠陞工部主事後任高州府崇祀名宦

舊志參通志

韋明傑字叔萬號青岑烏程人進士崇禎間知縣事質直明決愛士恤民時值增餉加派民不堪命明傑具詳告疲頻駁頻

覆得較他邑稍減纂修邑乘著有顓天四議康樂民隱六冊
聽雨齋集尤篤志好學山川勝境無不周歷題詠每月課試
諸生選其尤者延入署內讀書衙署文廟城隍祠鳳真閣皆
捐俸重修在任九年焦勞勤苦昕夕不遑後謫去士民惜之

崇祀名宦 舊志參通志

徐學禮字約我蕪湖人崇禎間由安慶府訓導陞本邑教諭侗

儻有才倡修文廟督工告成選本府教授 舊志

陸朝貴瓊山人吏員崇禎間任縣尉不孳家眷一主一僕行李

蕭然居一年以病歸臨行題壁間詩云我來何所有清風兩

袖歸可想見其廉潔云 舊志

唐昌齡字吾修華亭人進士崇禎間知縣事年少好學以文學

匡吏治以撫字恤民艱廉介誠恪士民慕之 舊志

曾宜高字清仲順德舉人崇禎間知縣事慈惠簡易視民如傷

邑人以外公稱之壬午窩賊猖獗殺哨官尹某偵宜高將解

任相戒曰且毋劫城驚動外公宜高聞之即督義兵勦捕殲

賊魁焉解任時作詩別士民有里巷傳呼爲外祖之句蓋紀

實也 舊志參兵變記及府志

余昌祚字叔正進賢人歲貢崇禎間任訓導性甚端嚴教人以

正心術爲要諸生有過舉必面規之所著有正心論飛鳶草

春秋繁露纂訂書經講義陰符經註孫子十三篇註及古文

稿當鼎革之際避居潭埠死之日家無宿糧殯葬罔措近鄉士民皆攜斗米尊酒歛金以賻焉

舊志參府志

皇清

杜章卿新建人歲貢任邑訓導順治二年署知縣事招募義勇捐貲助餉會瑞州李凌虹等作亂連破上高新昌直逼萬載典史營弁皆遇害章卿衝鋒力戰被執不屈死

采南昌府志

補

高鵬起字搏九曲沃人進士康熙間知縣事寬厚廉勤不挈家人自理案牘蠲逋賦數百兩招逃亡數千家初下車訪疾苦紳士陳利弊十二事一一聽從吏畏民懷文學政事俱優以

病告致

舊志參山西志

吳自肅字在公號克庵海豐人進士康熙間知縣事爲人慷慨有大節莅任三月卽值吳三桂寇長沙傳僞檄招降人情洶洶自肅擒獲僞使設法勦捕民稍安堵時大兵駐袁都守檄自肅至郡助辦軍需或議開濠溝自肅以勞民動衆力止之邑兩遭兵陷民亡田荒自肅繪圖詳報前後至數萬言課士有作文家法陞內閣中書去合邑戴德共建講堂立木主祀之并崇祀名宦

舊志參通志

劉報玉峽江人少負勇畧有氣概乃隸戎伍康熙間隨營防守萬載寇襲城冒矢石先驅平復白良及高城窮坪石嶺白水

諸賊以功授袁臨鎮標後營把總逆賊揭玉卿兄弟又猖獗
力破之擒其渠魁拔補臨江千總尋陞守備甫二載解組歸
田口不談兵 采岐江志補

常維楨字晉臣號白山廣寧人康熙間知縣事年甫弱冠精敏
聰察吏莫能欺下車誓於城隍神曰某祇飲萬載水不要一
文錢違則殛之在任七年清白如一值兵荒洩加之後民多
死徙招徠撫字不遺餘力丁缺田荒逋賦檄催甚急維楨瀝
陳憐苦民得從容完納公餘少暇卽力於學工詩賦及書法
修學宮設義學葺衙署纂邑乘俱捐俸倡理陞行人司士民
爲建講堂立木主祀之 舊志

何錫命字康侯廣寧人例監康熙間知縣事廉勤明決百廢具
興舊治傾圮捐俸鼎新之因按察司行衙改爲常平倉復於
學宮旁建立義館聚生徒其中擇名師課之勞來備至邑遭
寇變錢糧尾欠盈千傾囊墊解去之日邑人立去思碑以誌
不忘 采去思碑補

施昭庭字筠瞻號寄篁嘉善人進士康熙間知縣事精勤嚴密
雖黠吏猾役不能欺下車後卽倡修文廟禮賢士有知人鑒
癸卯臺灣逸賊溫上貴嘯聚岐源倉卒猖獗昭庭秉刃立堂
上以節自矢旣少緩設方畧立賞格招徠義勇指授擒勦晝
夜率吏卒巡城賊畏不敢出卒以撲滅事平逆案糾紛虛心

平反不妄罹一人先是將弁挾昭庭出結欲借勦寇以肆掠
昭庭力拒不允而一切軍需悉捐俸資給概不擾民以故事
雖旁午而耕鑿晏然踰年以勞瘁得心疾告歸檢閱徵冊民
欠尚數百悉爲墊解窮簷歌舞之

舊志參府志

施士昌字繁安宜春人性孝友精明勇幹任本府協標把總調
萬載適岐源溫上貴叛士昌率兵勦捕奮勇追擊上貴奔竄
鄰境被獲邑賴以安

采宜春志補

許松佶字吉中閩縣人吏員雍正間知縣事時邑城積久未葺
捍蔽無資松佶倡修保障屹然爲政一本剛直無稍阿徇豪
猾憚之

汪元采字蔚觀京山人例監雍正間知縣事實厚愛民萬邑舊
有水推沙塞不可開墾荒田時議欲復舊額元采親爲勘實
力陳於上因得分別陞科糧免虛賠隨漕分徵不便於民詳
請與地丁并徵康樂下嵐二橋及康樂祠常平新豐二倉寅
賓館悉捐俸倡修邑乘殘缺編輯訂正去後邑人鐫刑清政
簡士樂民安八字於石

嚴在昌字季傳仁和人進士雍正間知縣事立法嚴明豪強斂
迹捐俸五百餘金創建龍山書院去任後復捐八十餘金置
膏火田六畝四分選名家文二百篇親爲評點與諸生講論
紳士晉謁者惟以勤學問端品行相勸勉無敢干以私是時

營房在學宮後在昌以為非宜倡捐五十金移置花園營房
內城陷補修遷調後人猶稱道不置

江元璐上元舉人乾隆間知縣事為政一本慈祥有漢劉寬之
風而折獄致刑民志畏服嘗謂民皆三代直道常行其淺薄
刁惡者由吏不以古治治之耳至今稱遺愛焉

魯鴻字厚畚新城舉人乾隆間任教諭姿性方正能詩文時邑
中文體少弱鴻主持風雅以六經諸史及莊騷秦漢李杜韓
歐諸集令諸生沈潛諷詠每月課必自立一程以為模範筆
有鎔鑄縱橫跌宕文體為之一振後登癸未進士任河南沈
邱縣

張立中銅仁舉人乾隆間知縣事清廉勤敏養士息民包苴不
入自奉澹如額署廳曰節愛堂值歲饑捐俸賑卹每吏深自
行巡訪盜藪奸窟鋤刈無遺御事後宦橐蕭然餽贖概却不
納曰吾本慣清貧此去教讀儘可自給無為汝輩憂也人以
廉能稱之

楊長佐江津人進士乾隆間知縣事為政不事苛刻作養人材
增置龍河書院修金丁艱留萬父老奉隻雞斗酒者無虛日
王文明龍南舉人乾隆間任教諭愛恤生徒有受業者口講指
畫終日不倦文體少乖必痛削乃已一時間字之車盈門

高蟠善化舉人乾隆間知縣事愛民息訟值歲荒有童子橐金

市粟中途遇害獄久不具適有素不諧俗者眾思陷之蟠知其無辜曰鍛鍊成獄吾不忍也與其殺一不辜毋寧自棄一官勘案不動聲色委曲開導動以天性民不忍欺間有爭訟幾愧履君子之庭後因長沙鄰萬自行請調民欲挽留爲例所格共相惋惜

卞坦綸儀徵舉人乾隆間知縣事英敏果決紀度修明訪邑中疾苦知強暴爲害坦綸鋤去之不遺餘力德威並著人咸畏服

來珩蕭山人進士嘉慶三年知縣事有幹材臨事勇決民多憚之縣試向無考棚集紳士捐建旁闢培風講堂精心校士不可干以私時士客構訟毅然以另額定例請上司動色爲飭通省查辦不果行後卒如所請表章節孝詳請緩征皆可稱焉尋以循卓調臨川去

陳文衡字品士號訥齋龍巖州人進士道光六年知縣事精明勤幹吏莫能欺下車踏河流被煤渣壅遏水溢市衢遂捐廉倡疏并改崇文堰爲石閘以資蓄洩及境內溪河有碓壩礙灌溉者請上台悉禁添設以暢水利修南門城樓額曰迎薰時文昌宮賓興堂甫鳩工多方獎掖以底於成校士以實心撥置田畝山場助龍河書院膏火捐廉倡建東洲書院每課上走必躬閱錄疊疊不卷以文學飾吏治士類頗依之因母

憂去邑人惋惜

萬載縣志卷二十

人物

自劉邵作人物志後之史乘因之志以人重人以志傳詎非閭里光哉顧必區類分紀若名臣若宦業若儒林文苑苟幾微之未愜卽位置之鮮當舊志分目頗蕪陳志譏其濫良非誣已茲倣史例彙括人物不必標目恐人兼數善難爲縷析也更本善善從長立彙傳一門壹以時代爲次俾後采輯者有所擇焉撰人物志

唐

應智頊鳳嶺人隋末蕭銑林士宏亂豫章智頊於華林山屯兵

置柵保障一方武德五年李大亮宣撫江南智頊歸之因表
置靖州命爲刺史功德及民民愛之如父母八年州廢改袁
州刺史更隋室大亂之後與民休息鎮以清靜民安樂之蔡
豫章古今記嘉定志補

按十代文獻畧云豫章古今記應智頊高安萬載鳳嶺人
以其地本屬高安後入萬載故併言之通志據瑞州志定
爲高安人殊失攷又豫章書稱建城人亦從舊稱當追改

廖洪進城鄉人居窮養親克盡子道大中九年

安志作
元年誤父母繼

沒捧土爲墳結草廬其旁號慟無時髮未嘗櫛有青蛇如龍
長不踰尺止其側風雨輒失所在又大蛇蟠廬中有鴈中箭

來下洪爲脫箭敷藥創合乃去又有白獸相繼而至鄉閭異
之咸通中縣令朱郁以狀聞廉使京兆韋上其事勅以孝行

感應令本道特加旌表祀府鄉賢及本邑忠孝祠

舊志參嘉

定志

按唐書孝友總傳亦載洪爲萬載人通志乃以唐時無萬
載改爲筠州不知唐無萬載又焉有筠州此通志所當更
正者

陳節萬載鄉人生而英偉中和二年鍾傳爲鎮南節度使選充
白沙都鎮討遏使并特奏署潭州長史兼御史大夫威惠並
著大順元年充使入朝昭宗召對便殿賜工部尙書以疾請

假西還卒於新賢里耐葬錢田村原子四長從請鎮南觀察
衙前兵馬使充楊林鎮副使次從訓鎮南觀察押衙檢校國
子祭酒兼御史中丞次從錯次軍郎 采墓志補

南唐

李微古高城里人篤學有詞藻登進士第授起居郎兼尚書吏
部郎中保大十年除袁州刺史勅改其故居高侯鄉高城里
曰懷舊鄉孕秀里到郡靜理壁立不可干以私五季之亂袁
州更刺史二十有九悉武夫勲臣微古至以儒術飾吏事循
刺史鄭審舊址立孔廟備祭器絃歌獨不衰焉嘗以私財百
萬代其鄉輸稅召拜樞密副使後以累賜死祀府名宦及本

邑鄉賢祠

舊志參徐錯記南唐書

徐鉉字乾璫一字鼎臣歐桂東鄉人十歲能文工隸書尤好李
斯小篆交泰中爲左右廂兵馬使檢校國子祭酒兼御史中
丞上言貢舉初設不宜遽罷楚州刺史田敬洙請修白水塘
以實邊東因緣侵奪民田鉉按視籍歸其主事後主爲吏部
尚書入宋太祖授爲率更令歷左散騎常侍太宗立獨直學
士院從征太原軍中書詔拔筆立成奉勅與湯悅同撰江南
錄至南唐亡國之際但以歷數存亡論之淳化二年貶靜難
行軍司馬弟錯與鉉齊名第進士爲秘書郎齊王景達奏授
記室爲殷宗義所誣貶烏江尉歲餘召還授右拾遺集賢殿

直學士重忤權要以秘書郎分司東都元宗愛其材復召爲
虞部員外郎後主立遷屯田郎中知制誥集賢殿學士召拜
右內史舍人賜金紫直宿光政殿兼兵吏部選事與兄鉉俱
在近侍號二徐宋李穆使江南見鉉及錯文章歎曰二陸之
流也後見國勢日削憂憤成疾卒

舊志參南唐書洪武志

宋

蕭杞字楚材新興里人宣和進士正奏名第六學邃於易精大
衍之數性剛果歷州縣多治聲終廣州通判市舶提舉祀鄉
賢

舊志參安志

劉長者時人樂其德以長者稱之不求聞達倡明道學結讀書

堂於謝山與楊萬里謝諤友善皆題詩爲贈

舊志參李志

彭道琛中嘉泰解額將赴京闈倏失怙恨不獲祿養遂隱居不
仕甘貧守約一切世味泊如也惟彈琴賦詩見志而已

舊志

龍以禮祥興二年舉賢良方正任本縣丞改江南建德丞皆有
遺愛致仕後居鄉沈靜耻於自耀人尤企慕之

舊志

元

張巖字子崖獲富里人官臨江教授嘗於所居南山之麓作亭
榭園池構書院廣袤數里得山水泉石之勝青山趙文歎其
讀書之美擬諸廬阜衡岳書院中有先聖殿六君子祠藏書
樓講堂齋舍畢具肇邑中學塾之盛焉

采虞集記補

敖仲實字若虛號玉溪白良村人舉孝廉延祐間任新昌州同知有政聲重修羣賢祠增祀知縣甯麟鄉賢姚勉各爲之贊州人稱爲賢守遷西番大葉茶提舉三任中書行宣政院事爲人樂施予尤喜建橋邑中百里內外多其創立而錦江牟村昌江三橋爲最著崇祀新昌名宦弟銓號玉澗任梅嶺長官兄所建豎每翊贊之子濟字百川任岱山廠鹽司令重修錦江橋按舊志仲實玉溪誤爲二人參新昌志改

黃璧字元瑜歐桂西鄉人識趣高遠沈浸古籍以大德歲饑應詔賑濟恩例授江州權茶大使吳激虞集揭傒斯歐陽元嘉其行義皆與交焉凡捐貲三修學宮及講堂齋舍舊志

歐陽朝字朝宗白水里人初遊夏果齋之門第至順進士歷官通山龍南二縣尹才猷懋著以文章名世學者改事果齋禮事之揭傒斯黃縉皆與唱酬入贛州名宦舊志參贛州志

郭擦獲富市人左手及兩足皆反掌以右手擦地行因名母及弟皆病廢乞於市以養者十八年至正二年冬遇道人手藥五丸授擦隨服而愈旣以藥五丸遺擦母母服二丸亦愈鄰富人有病如擦者以金求一丸擦授丸却金鄰病頓愈感其德遂廩擦母子終身建有孝義坊崇祀忠義孝弟祠舊志參

安志

黃盅字子中璧之弟受學於臨川吳激奇其篤志以孫女妻之

安志作以子妻之誤為題其書室曰大本堂第至正進士授龍泉教諭明洪武元年詔修元史以順帝事無實錄徵盅等十二人編行天下凡涉史事者悉送上官祀鄉賢舊志參吳澂行狀朱彝尊趙伯友傳

盧滉號石溪歐桂東鄉蓮亭人性度曠夷行誼雅飭工詩文所著有海槎空語廬陵王從叔為之序歐陽雲汀謂滉樂府諸作不減唐王建張籍舊志參洪武志

明

歐陽汝洪武六年舉儒士任本縣教諭性質穎敏學問廣博元亂後能以師道自立教有成效舊志

龍鐔字德剛少與梁寅黃子澂相師友年十九選入南宮曹國李文忠司成宋訥以國士薦之召對稱旨命同貢士張宗濬等隨春坊官入直講陳田里稼穡及古今孝弟文學諸史數年詔治水於泰州視軍遼東川雲所經利弊當興革者必以聞帝嘉其能特授浙江按察使歲游饑俸贖悉捐濟各郡以不避權貴為忌者所申左遷長洲知縣兩浙士民遮道泣送歸侍養歲餘適晉府恭王薨世子幼上難其傅都御史袁泰刑部侍郎張思恭以鐔對起為晉府左長史王委以督兵重權時西戎寇太原鐔率軍禦之戰於河汾有功北平檄徵晉兵靖難鐔泣陳大義堅不與引兵至城下力攻不克竟趨金

陵卽位後飛詔械鐔錦衣獄不屈死時癸未十月九日也年
僅四十子叔馳叔驥方數齡其遺草家書及尙書李至剛長
史劉本彝主事張楫諸輓贈猶有存者入山西名宦祀鄉賢
舊志參山西志安志

按龍長史執兵抗節甘死如飴載皇明通紀崇信錄旌忠
事蹟等書洵足與黃練諸人爭烈惜未並加謚典乾隆二
十五年知縣張立中始倡立專祠詳教諭魯鴻記

龍儀字希文號鳳虞永樂進士任陝西永壽知縣廉潔嚴明盡
發胥役之奸邑以爲神召爲刑部郎部多大辟未決儀至爰
書悉定時黃州寇起當道以儀才調黃州同知賊望風解轍

署府事期年愛民下士置學田贍諸生膏火立碑記之累升
山東叅政著有龍江別集入陝西名宦祀鄉賢孫毓霖任滕

縣教諭 舊志參陝西志通志

易復亨字子謙勤學問元季寇亂偕兄泰亨震亨奉母避山谷
爲羣盜所獲以計遁去寇平奉母還修舊業於烏溪構壽萱
堂母疾侍湯藥唯謹舉孝廉不就撫姪如己子常節贏餘以
賑不足邑人德之年六十四卒少保楊溥銘其墓子節進士

另有傳 舊志

歐陽恕字秉忠生九歲而孤執親喪若成人構竹泉書屋集里
申子弟讀書其中中書舍人蔣廷暉額其居曰耕讀山房學

者稱爲耕讀先生季子信永樂舉人官同知卓著能聲年七十卒安福吳節銘其墓輯輓詩甚多秀水呂原爲之序信孫曙燦賑饑施寒衣頗多義行年九十嘉靖間奉例給冠帶曙燦孫材萬歷恩選任寧州學正淡泊自甘材弟學孝友謙和縣舉善人按院獎之

舊志

彭昶字時顯舉人任浙江道御史嚴毅自持豪貴震懾當時稱鯁直不忌避者必曰彭御史

舊志

劉蓋字迪誠性剛直力行孝弟第進士以刑科給事中巡撫湖廣表循良黜貪墨綽有風采論事忤旨調通州判官尋復爲給事中言愈切直謫嚴州經歷卒祀鄉賢

舊志參安志

易節字時中復亨季子第進士觀政時聞母病即請假歸感青蛇銜菜黃鳥入幕之異母病瘳迺授行人歷禮部員外郎宣德間知成都府至誠待人治尙清簡陞貴州左布政使撫字心勞羸夷化服一時治行翕然稱長者民不忍欺焉卒於官入貴州四川名宦祀鄉賢

舊志參四川貴州志人物攷

楊資字永凝號友善早歲知名由舉人任浙江黃巖教諭益力學日與諸生課藝卒於官子濤應恩選廷試第一例擢州縣以科第自期改全州學正陞眞定教授孫模歲貢人稱三世濟美著有忠孝廉節四箴訓子孫

舊志

易震字省躬歲貢任山東朝城知縣居官清廉有德於民朝民

立祠尸祝之好題咏有閒居吟從軍行觀魚諸詩尤膾炙人口

舊志

黃恭沈靜敦樸學問淵遠由舉人任大理府訓導以校士功陞
衛輝教授歷校湖浙閩三省文闈薄宦四十三年箱篋所藏
書籍而已

舊志

郭彥正號敏齋力學敦行嘗捐修邑仰山祠又於白水等鄉置
廩儲穀歲歉以貸饑者死無歸則營葬之有肆侵害者曰我
將訴敏齋輒少却其爲世所畏敬如此建絲陰書屋以課子
孫子善慶喜吟咏爲士林推重孫瓊瑾另有傳

舊志

郭彥明號恕齋事繼母委曲承其意所得分產悉以歸弟鄰有
不獲贖母而鬻妻者貸之貲全其夫婦卒不受報後舉人才
任湖廣黃陂縣丞以子儀貴贈郡丞儀字時望宏治選貢知
河南永寧縣在任四載嘗單騎靖寇亂捐俸代民輸納清丈
減稅養老卹孤有郭青天之謠尋陞金華同知丁艱歸士民
有護送至其家者

舊志 黎安志

郭瑾字邦器十歲遊庠第進士擢刑科給事中正統六年陞刑
科都給事中在科持身端謹不激不隨人稱得體以論中官
忤旨出知潯州未幾復原官八年陞刑部右侍郎協理部事
理獄慈恕不務苛刻時有欲文致數囚死罪者諸法司皆阿
意瑾獨慨然曰殺人媚人吾不爲也竟寬釋忌者銜嫉之遂

致仕歸有朝臣贈句云澤深刑部無冤獄品重黃門有諫章
蓋紀實也著有綠陰書屋集年八十三卒祀鄉賢兄瓊字宗
器友愛極摯瑾膺鄉薦猶不廢課督後亦以人才授國子博
士親老致仕歸布衣蔬食泊如也嘗買妾黃氏詢知爲良家
女郎送還之卒年九十三今子孫皆繁衍

舊志參安志明一

統志列卿傳

歐陽煥以歲貢入國子監永樂間授浙江上虞知縣政績盛著

陞廣西按察司僉事克振風紀

舊志參廣西志

劉執中字處權歲貢任平樂照磨地雜土酋嘯聚不常郡守以
執中有清操委總巡召酋長多方開示以禮諭遣於是無復

畔者擢知湖廣江夏縣事冲和靜鎮豪悍之俗一變以疾解

任宦橐蕭然江夏人如失父母年八十八卒

舊志

常質字敏實歲貢任開封經歷適民苦方某之虐觀察使按部
質抗論不避方被劾去出民湯火郡中爲之謠曰開封若無
常百姓盡遭荒蓋指荒爲方也其梗直如此改瓊州經歷

舊志

郭溥字曰仁瑾之子以歲貢任徐州訓導啟迪有方陞敘州教

授子諤字王臣號南溪選貢任遼東衛經歷釐占籍積弊調

練精嚴募應之質一清

舊志

龍以韶又名舜韶平生多隱德嘗有盜夜入其室韶覺而語之

日若膂力方剛獨不足自食耶能改行吾界若資盜愧求脫
予之貲而去盜卒改行韶終身未嘗語人課子孫勤學子時
舉四川知縣另有傳

舊志

龍駿字執毅篤學工詩文宣德舉人歷官廣東河源訓導翰林

孔目刑部檢校天順間遷山東金鄉知縣廉明仁恕吏不敢

欺居家孝友親喪廬墓三年入山東名宦

舊志參山東志

李瓊字蘊素舉人任廣東高要縣順天府訓導陞詹事府校書

翰林院侍書遷汀州知府建學賑荒決訟如神吏鮮侵漁之

弊值上杭寇發征討無功瓊躬詣寇穴陳利害寇悉降境賴

以安卒於官祀汀州名宦及本邑鄉賢

舊志參汀州志安志

何英字實夫成化舉人仕至南雄教授勤躬勉職生平力學經

史子集靡不該貫尤精於易尋繹義理耄耄忘倦

舊志

龍時舉字用之成化中貢太學知四川彰明縣事清慎有治聲

龍州土酋嫡庶爭襲久不決時舉往按却其賂鉤致其黨訊

之弱者得直又有大姓犯大辟傾貲求出卒論如律已而移

疾歸至潯陽無餽舟費家人質衣物以逆之祀成都名宦

舊志

志參李志

柳萬春號謙山幼穎慧方伯易節奇之以女妻焉中乙榜由歲

貢任湖廣麻陽教諭與諸生以行檢相礪講授得麟經之奧

多所成就三署邑篆有循聲士民咸戴之

舊志參李志

伍祥字士吉號東溪由歲貢任湖廣祁陽訓導殷勤課士士皆德之九年告歸諸紳繪像賦詩以贈家藏有五世金門待漏圖嚴介溪爲之序

舊志參李志明湖志

李瑄字子玉歲貢官廣東揭陽訓導愛士如子請諸有司蠲其徭役秩滿歸諸生泣送贈以榕江餞別圖子舜舉亦貢生任

南雄訓導

舊志參李志

辛正爵字天錫號受侯歲貢任潯州衛經歷郡守夏雲盛服其才事多委之適寇亂以退敵自任命心腹潛入寇穴爲內應殲其魁餘黨潰散夏以膽壯于城智足保障薦之丁艱歸不復出子燦寶忠厚端方知縣陶舉鄉飲

舊志參李志

張樂號松軒約已好施歲饑賑粥見橋路壞者輒修之族某貧鬻其身樂以貲贖回更爲成室宸濠之變知縣張以樂有膽智委解軍餉給路費不受後奉詔賜冠帶百歲時有自題詩卒年百有七

舊志參府志

按府縣舊志樂俱作鑿今更正

彭顯字遵道生平慷慨多義舉族鄰告乏則賙之或稱貸不能償卽焚券喜賓客四方賢士禮遇極隆正德間知府羅輅檄修郡城顯領其半旬日告成後以輸粟例給冠帶城北有巖蒼翠幽鬱顯構亭其上延賓課子日夕遨遊自號翠巖居士以子澄貴贈奉政大夫太史唐順之表其墓郡守李春芳爲之銘

舊志

張鑑字時重號素庵淹通羣籍貢入監期滿銓司注上等授淮
府審理副以目疾乞休居林下二十餘年每有所作命孫輩
代錄其稿子燦字靖馨嘉靖歲貢官雲南江川令七年愛士
恤民孫澗字以達和平教諭澍字以宗以字行生七歲而燦
亡母雙氏延師教之諸嘗報進儀賓傾貲以免族屬有侵官
帑者陷之入獄燦代償家遂中落然嗜學彌篤鄉捷後再
申乙榜選安仁教諭謝擊販匱適母病奔歸竟卒著易箋藏
於家

舊志叅李志

龍玠字桓玉時舉子貢入監選廣西桂平知縣多惠政徭役之
編尤詳察均平撫軍頒其式於旁郡桂平地雜獠緜綏馴不

易玠撫叛獠數百人不血一刃民皆德之生平好古博核善
詩歌著有怡雲懶仙吟兄瑗字文玉亦著有東臯五稟草貢
太學時購秘書法帖局門研習屢試高等授黃州通判卒於

京

舊志叅李志

彭澄字一清號龍溪中嘉靖亞魁任永州推官聽獄平允擢太
僕丞陞工部員外郎命治南河先是漕河淤塞堤堰傾頽水
汎濫二百里間餉運苦之澄議復河故道會歲饑請發帑以
募代賑不三月而工集遷河東轉運副使擢守延平多惠政
值海寇犯順浚隍練卒延賴以安顏其堂曰忠愛議割漳泉
地置大田縣增修郡志三載入覲乞骸歸著有恕庵遺稿守

延廷見天游別集寓鐔稿祀延平名宦弟渾號蒙泉邑增生
入監選北京光祿監事澄守延平時屢以書召不赴其耿介
自潔如此孫紹蕃岸生好游名山水遇庵寺橋路捐貲助修
舊志參李志湖南福建志

鮑良材字國珍幼穎敏年十三補弟子員家僅中產喜急人困
有難娶者多方翼成之嘉靖初部檄登縣城邑人以亟興重
役有難色良材訴當道得緩舉晚以詩文自娛與彭澄諸人
相倡和遺稿被焚不傳舊志

龍士通字允升號對山舉人任福建長汀知縣地饒而俗黠冰
檠自矢供具日止腐菜家童三人見其清苦遂逸其二嘗題

一聯於署云一力自隨官舍足獨衾無愧夢魂清高御史詩

按閩風力巖峻特薦之遷彰德同知卒祀長汀名宦及本邑

鄉賢舊志參安志

龍國重字仁卿時舉孫由選貢任湖廣鄱縣訓導陞福建浦城
教諭需次吏部時見都民火甲之困卽疏以聞弟國相字明
卿亦以貢客京師公卿爭羅致之題贈輒假手焉授南直崇
明教諭國賢字愚卿以字行亦以貢任南直無錫訓導陞
州學正署嘉魚篆七月淡泊自甘新學宮修預備倉士民歌
詠之年八十餘卒著有茅窾微聲集藏於家國臣另有傳舊

志參李志

龍國臣字瑞卿以選貢任廣東陽江教諭嚴以律已寬以訓士其歸也諸生泣送至會城子允中號芝山嘉靖舉人性耿介知湖廣湘陰縣廉明奉公甫及考而母訃至匍匐歸遂不出素長於古文有祭汨羅廟文九仙宮碑序爲世所稱

李志湖南志

舊志參

張棟號環溪歲貢授浙江永康訓導陞福建南靖教諭值倭寇雲擾當道識其才命攝邑篆有治蹟交章薦之旋以疾告歸與修邑志卒年八十有五長子以仁字樂山篤於孝友萬曆中由貢生歷任信豐上饒訓導遷瀘溪教諭欽州學正所至爲士林推重著有鑑性纂粹卒年七十五次洵字以信性敦

樸寡言笑亦以貢司訓臨江遷教諭歸卒年八十一皆屢舉鄉飲

舊志參李志

龍人俊字廷卿力學有膽畧嘉靖辛卯冬巨寇黃牯眼率黨入境抵其家適老母病臥俊奮擊手殲二魁賊由是遠避邑賴以安人服其孝勇後以貢官福建南平訓導

舊志參李志

鍾憲鼎號石峯英敏博學三申乙榜以歲貢任南直高淳訓導嘉陳生九齡之才捐俸助之後陳登賢書任宜春令卒食其報孫鍾美以孝義稱娶宋氏瞽一目伉儷甚諧母沒廬墓三年後以貢任餘干教諭講學胡敬齋祠聽者五百餘人卒於官著有詩稿

舊志參李志

藍珏號近山積學有幹才以歲貢任浙江嘉善訓導捐俸以卹貧士民死無歸者助棺瘞之倭寇竊發院道委守北城賊不敢逼陞福建晉江教諭復遇倭亂中丞王咨以兵畧寇平陞惠州教授山賊又亂撫軍張杰資其謀得破敵薦擢廣州通判卒於任珏性孝友所得俸悉均其弟未仕時有侵學地置水碓者親訴撫軍傅以清復之遺有近山在望冊藏於家

舊志參李志

龍以仁字子善郡庠生遊鄒守益之門有至性生甫一週母卽逝稍長結廬塋畔追服斬衰三年彷彿母像圖之飲食必追祭事繼母易及鄧咸得其歡父三綱邁疾衣不解帶者數月先

後葬祭悉如禮廬墓凡九年感白雞號犬之祥集木漂還之異郡邑上其事祀忠孝祠遺有瞻思堂集

舊志參安志

葉璽號可亭舉人歷知浙江雲和景寧縣事遷池州同知清白不染所至有竹葉清之號解綬歸日手一經課子孫好古多著述成一家言刻有發祥堂草

舊志參李志

宋良佐字守忠進士授淮安推官清操有爲擢兵科歷戶科都給事時有宋黃門之稱彈劾不避權貴如正中宮肅閣監停翫作通海運諸疏載大政記中累陞大理右少卿祀鄉賢

舊志參安志

彭明甫字則誠嘉靖間由監生任南直寧國縣丞約已愛民有

古循吏風去之日行橐蕭然僅敝衣數襲而已入江南名宦
舊志參江南志

張賢傑字古逸性孝友甫二歲而孤時與寡母相向泣至食且
廢箸比長喜讀目十行下會南北重役伯兄以僉解賠糧被
繫傑請代者三年家產罄盡兩兄繼歿且無嗣傑事二嫂有
加禮晚得璧親自課督愛勞備至以璧貴贈雲南按察使參
議舊志

辛光佐字蓋臣號古泉慷慨有氣節貢入京適族兄某解帑失
銀三百兩監追無措光佐卽爲貸償至鬻己產不責報任安
吉州訓導加惠貧士甫一載以疾歸子謙吉字抑甫性謹厚

以督耕課子爲事晚年子敏道由舉人厯官褒城知縣順州
知州嘗書莫盡三尺法常存四知心誠之年九十一屢舉鄉

飲舊志參李志

袁本初字主善與兄本中先後應歲貢初任衡州訓導陞浙江
富陽教諭有師範士林悅服孫汝祝萬厯舉人篤學好吟咏
建觀音堂於東門外讀書其中未仕卒舊志參湖南志李志

喻濟時字汝霖世敦孝友祖嘉號南園博洽工詩父律軻構孝
友餘慶堂儲書訓子著述甚多至濟時始大家聲由隆慶改
元恩貢授南直歙縣丞攝篆黟邑有清操陞四川墊江令士
民立碑頌之擢蒙化通判有德於民彝首悅服尸祝無異墊

江子六仲子卿舉人署山東長清教諭季子良歲貢任武昌
通判

舊志參李志

辛明述字學古隆慶舉人素性孝友自甘窮約不喜奔競以孝
廉終其身

舊志

彭天補字袞卿澄長子舉人官定州守遷河間府丞時海寇不
靖羽檄飛馳餘艘之卒一切仰給天補悉心料理以凱還論
功旋爲人齟齬改調東昌受事兩月卽挂冠歸構煉石別業
日與友引觴賦詩追頌世德有三世綸褒跋弟天禎字禔卿由
太學生任高州經歷有能聲司梅祿權稅課溢前額爲同官
所忌旋致仕工二王書法購藏真蹟極多

舊志

宋一和字齊樂號節齋由監生任漳州照磨署漳平縣冰操自
勵有病死於獄者輒施棺瘞之叅將某強佔屯田委之勘斷
還本軍不少狗居家孝友丁內艱哭眇一目歿後邑人呈舉
鄉賢移文漳郡稽查得實

舊志

劉冲宣其父碧富曾鬻嚴田石橋冲宣有父風嘉靖庚子歲饑
捐金易粟賑濟一方全活甚衆子金魁金耀萬厯初窩寇之
亂知縣徐一唯以魁才命帶兵追勦寇平不居功耀亦好義
輸穀二百石備賑耀子良臣娶石城王曾孫女助修丁田秀
江二橋輯題贈爲高岡雅韻集

舊志

唐輯賢性孝友父七十而瞽寢食不離者十年如一日爲親卜

葬地卽以葬遠祖且公諸疏族焉會因累入獄見無告者輒
餉之並爲謀脫不責報兩舉鄉飲卒年八十九子應試萬歷
舉人 舊志

易聖教號六虛甫七歲塾師以直節堪爲友令屬對教應聲云
虛心是此君十六遊庠讀書謝山深處有咏謝山詩母病侍
湯藥衣不解帶旣葬復廬墓出所積修西江橋開佛嶺黃田
諸路宋九儀爲之傳 舊志

張汝誠庠生痛失怙恃不求祿仕肆力於詩古文彭自新宋九
儀輩交重之晚遊京師與吉水劉兌陽姚江魯雅存倡和所
至留題其爲人仗義有弟貧力爲婚配歲給膳穀曾修鏡山

路置林家磨渡船 舊志

宋九儀字夔卿號鳴珂少穎異九歲應童子試三試皆第一十
二歲食餼二十六恩選部試後授福建建寧知縣尚文學除
盜賊課農桑禁巫戒溺女廣倉儲歲凶捐俸積穀民稱曰宋
公倉入覲單騎北上父老爭遺財帛悉謝却乃爲立生祠九
儀取其本主以歸曰吾不務虛名也覲還請終養居喪哀毀
骨立林居三十餘年僅近郭田三畝惟吟咏自娛有和淵明
六咏詩具載環堵漫言年八十一卒入福建名宦祀本邑鄉

賢 舊志 泰安志 福建志

張璧字世良號崑岡第萬歷進士起家南兵部主事游歷郎中

值營兵缺餉大譟壁單騎擒首亂事立定遷廣西按察僉事
巡左江却關門例數千金興學校課諸生定交南黎莫二氏
構殺之亂轉右江叅議忤直指使改雲南右叅議分守金滄
議罷大理採石歲革麗江樣金四十八兩值歲饑斗米錢三
百臺司議以米代杖每就禁多斃壁歎曰吾寧違新法以一
官易多命下令悉除全活數百人士民德之以積勞謝病歸
尋陞本省副使累檄不起著有連城集祀雲南名宦及本邑
鄉賢子汝梅定州同知著有砥礪集

舊志叅廣西雲南志安

志

葉世美字濟之璽之孫以歲貢知福建龍巖縣至誠御物民不

忍欺顏其堂曰臨汝著有臨汝堂錄一切地方釐革條議洵
如指掌其禱城隍除草毒驅虎害及祭文信國諸文尤真誠
剴切又有飛兔草公餘合刻彭自新宋九儀爲之序今皆散

佚

舊志

譚炯號念橋力學好古由歲貢任杭州訓導陞湖廣鄧西教諭
從撫軍李見羅講學尋擢建昌教授主講羅近溪明德書院
著訓蒙禮集八行圖說學者宗之解任日許中有春臯釋化
冊學行兼修冊歸而貧甚所居不蔽風雨人共稱之

舊志

彭自新字滌之號祖銘進士初授行人卽抗疏請元子冠婚大
典一時重其風采尋陞刑部郎中出守重慶清廉平恕時楊

首初定自新爲善後計措置周詳陞本省副使歷陞雲南右
叅政分守金滄雲龍逆酋段進忠謀襲奪官擁兵叛自新計
誘擒勦殲渠散脅無亡矢遺鏃之費迤西以平遷按察使以
疾致仕歸刻有滇南政績祀鄉賢

舊志叅四川雲南志安志

宋良輔字效忠歲貢任安遠訓導府縣交薦有却饋揮金儲書
卹匱之語弟良弼字盡忠恩選入監出爲南直華亭丞政尙
慈祥有老佛之稱調衡陽經歷華亭人爲立去思碑抵衡陽
當道重其材委署興寧甫兩月士民愛戴一如華亭刻有兩
地遺愛記子繼伊歲貢任經歷繼儒任州吏目

舊志叅李志

龍應會與兄應期應明孝友篤至四世同居百口共爨院道旌

其廬應期由歲貢官南安教授造士多方儒林師表應明亦
以貢任連州學正

舊志叅李志

敖化成省祭以孝義聞父鳳錦性醇樸舉縣府鄉飲享壽百九
歲化成侍之如一日母何氏病不解帶者三月餘方伯來額
旌之嘗捐修白良橋黃皮尖路戊子己丑洊饑減價平糶貸
不責償於遭回祿出穀以助晚年歲制棺施無告者知縣畢
爲文獎之未仕卒

舊志叅府志

劉世科邑庠生己丑歲饑計親族之乏者悉周之秋成爭償却
不受己酉僉解南糧爲里中貧民墊解八十餘石晚年家落
處之泰然生平有犯不校佃戶不納租且加辱輒遜謝之有

私伐其木者與以金使另市卒皆感服焉

舊志

李正芳號心崖孝友善詩文由歲貢官永昌通判攝郡署州督

儲理捕皆著聲兩以軍功一以積穀三蒙欽賞陞寧美知州

致仕歸晉階四品屢舉鄉飲

舊志參李志

辛圖猷原名子光號衷抑萬歷舉人中甲辰乙榜授永新教諭

丙午分考廣東所取士五人皆名流丁未又中乙榜陞廣東

大埔知縣以清潔著逋戶頓輸流離漸復游調程鄉兩邑俱

有甘棠之頌告養歸獨力建南浦橋垂成復圯卒傾囊成之

自題其柱焉

舊志參廣東志李志

喻子賢字君實號蘭臺舉人歷知廣東鎮平平遠程鄉縣事以

廉能調增城數問疾苦民情悉達遇事迎刃立解戢蠹役無

所容奸至有求去者舊苦徵輸加耗子賢革去之黠盜誣良

多置不問諸自經服毒陷人者懲之風俗爲之一變至於去

郡胥之害民抑中使之橫索尤人所難丁艱歸士民多泣送

者祀本邑鄉賢

舊志參廣東志通志府志

鄭邦魁號少谷歲貢任崇仁訓導潔已愛士嘗捐俸爲王士煥

完娶併給以膏火士煥後得恩選劉某有冤獄廉其情爲白

縣令昭雪之所著有家居六律忘言篇讀涵養操持論漫賦

等詩子從孔隱月臺山刻有月臺山意

舊志參李志

鄭邦德號二谷由恩選任浙江縉雲教諭署宣平慶元二邑事

有聲陞南直望江知縣冰檠自守囊無長物獨喜詩文著有

春草堂集澤田遺稿

舊志參李志

丁守正字永表少負文名由恩貢任南安府訓導歷陞雩都教

諭蘄州學正窮經忘倦造士多方卒年八十二

舊志

袁伯明直慙不阿由歲貢任臨江訓導轉廣東和平教諭院道

以學優才練薦之攝興寧長樂二邑篆有德政各立去思碑

復陞東昌教授端方正直士皆慕之

舊志參李志

張紹渠號鳳陽邑庠生性剛介知縣畢姚咸重之每咨訪利病
多所擘畫值兵興增餉紹渠奔憇當道得末減水次倉濱江
路僻有厲爲祟多沒溺之患捐貲建庵以鎮之稟請重修丁

田橋倡建畢姚二生祠年八十餘卒

舊志

郭宏字字天衢號虛所歲貢任安福訓導見重於少司寇鄒德

派每會復古堂必相與講學卒於官士紳爭賻之子萬里選

貢姪萬鵬歲貢皆執業於鄉贈有詩句

舊志參李志

喻應魁號文字早失怙恃逢忌日輒悲欲絕髫年遊庠有聲人

爭師事之每歲饑傾貲賑卹邸舍有以色相挑者正容拒之

自號閒公新昌漆嘉祉爲之贊子懋敬天啟舉人長厚有品

舊志參李志

辛應軫字斗垣邑庠生篤學尚義不靳施予子承芳構別業於

九仙宮傍延師課讀孫嗣歲貢生順治間奉文開丈墾荒圃

以八難便文呈縣詳免之

舊志參田賦志

楊嘉和號榜山器識通敏由庠生貢入太學任常州經歷多所
建豎委權稅辭至清操不染薦擢涿州同知遂歸建步雲志
學二館課子姓修葺芳坑亭榜山小溪諸橋路賑粟捐楮不

勝紀

舊志

辛聯魁光佐孫舉人任永豐教諭捐建尊經閣有德教碑擢知

徐州城遭水陷撫卹兼至以事忤當道調劔州甫三月流寇

竊發備歷艱險謝病歸

舊志

彭之龍字言允以選貢入監中順天鄉試任陝西商南教諭不

局纖嗇不競浮夸卒於京高邑李標銘其墓

舊志

宋治字作明廩生任廣東海豐縣丞歷署永安長樂三邑誦其

廉明嘗捐俸掩露骸代貧生林某完逋賦又助王某葬父時

重葺綏戢堂孝廉關仰旒爲之記入觀行李蕭然遂歸長樂

民爲立去思碑

舊志

孫崇祖號翊存歲貢任建昌縣訓導陞羅定州學正委署西寧

多治行遷吉安教授西寧人感之有瀧寧輿頌太史韓日纘

序其行

舊志參李志

辛御良號柏坡淹通經史兩中乙榜郡守季德甫知其有史才

徵修府志任以筆削

舊志

王若昊號文川尚俠好施歲旱民饑所居李家園近吳楚通衢

捐廩設粥於道全活甚眾有賑荒詩云可歎年荒米若珠噉
噉飛鴈負饑雛化離盡作溝中殍黼座空勤雲漢思就食移
民需善政捐貲煮粥敢嗟呼幸延生命秋成日繪獻無勞鄭
尹圖孫祚長祚永並以文名各有題詠文集祚永歲貢生力
敦古道繼伯爲嗣孝事唯謹後伯年老生二子家產付永管
理及分析無纖芥私未仕卒

舊志

宋九德字士吉歲貢生任萬安訓導日與諸生課詩論文嘗捐
修五雲二十里渡頭坑倒橋灣路施埋露骸秩滿陞廣西融
縣教諭聞母訃捨地泣血遂卒於任著有五雲三桂齋集

舊志

周簞號雙溪歲貢雅度循循謁選時海鹽進士沈奎與同寓爲
繪圖賦詩以贈修撰茅瓚序之後任永興訓導

舊志

鄧繼耀字歧坡爲人忠厚推重鄉評尤好吟咏屢舉鄉飲不就
孫文輝頗善詩文

舊志

劉芳聲字經邦庠生博學尤精書法知縣陳丞拔之弟芳譽多
詩文著有芸窗蔓藁

舊志

楊正英號立吾好披吟尤善詞賦建有別業曰先春館以課子
孫子道亨庠生事繼母以孝聞孫汝相著有先春剩藝

舊志

辛明瑚號源泉歲貢修身謹行名節自礪性愛松植之園圃皆
滿嘗有句云栽松不獨來清風其實茹之顏如童前山有苓

能久服往往白日升仙宮亦一時風雅未仕卒

舊志

王若棟號槐庭家徒四壁下帷發憤郡試童子首拔之以數奇

不遇序記稿悉遭回祿僅存巖壑寸芳詩集

舊志

譚嘉材字篤夫萬曆戊午乙榜崇禎間歲貢父煉病危親嘗湯藥衣不解帶者經年撫幼弟嘉士成立知縣倫應祥以孝友

申獎

舊志參李志

譚嘉猷字廷獻事繼母以孝聞父病瘵癯禱天促齡以代分產以饒者讓弟入北雍有同舍友聶迪被盜困甚與同衣食更為作歸計子經濟資性明敏淹通經史兩中乙榜旋貢入京受知太史繆西谿先生崇禎中知縣韋明傑聘同修志

舊志

彭汪邑庠生七歲能讀春秋輯有春秋細講註述子應輝由例

監任山東平原主簿改南直潛山丞委查縣倉庫能清六弊

當道以芝蘭在佩冰檠為殮薦之陞烏蒙經歷未任歸

舊志

常大用字行甫淳心力學郡守鄭惇典奇之拔冠五學投合甚

權大用絕不干以私益見重泰昌改元以恩貢赴廷試逾期

禮部特疏補試時年七十有四選撫州教授陞石首知縣著

有易講子史粹語

舊志參李志

龍兆禎號退庵儀之孫歲貢生監試第一選廣西雜容知縣雜

屬要衝獠獠雜處盜賊不時竊發兆禎修城設哨造軍器以

備禦捐俸墾荒積穀備賑輕贖革羨民賴以安葺衙署學校

自爲之記巡按左永圖藩司涂紹奎以清廉才力薦之北上
卒於塗 舊志

宋繼芳例監任浙江鄞縣主簿轉延平經歷居官清苦如寒士
以祖衛經歷允恭年九十奉養唯謹遂不復出 舊志

彭簪古號子纓年十三遊庠攻文之暇喜談兵法習弓馬天啟
壬戌赴京適兵部選將材因就試授京營把總奉撥煉火器
教習先鋒甲子實授守備運砲鎮守山海關踰年奉閣部院
孫調撥出關鎮守未幾寧城破捷奏陞都司僉事題敘陞叅
將丁卯擢副總兵爲同官所忌坐以饑軍課變死於法督師
袁憫其無罪給勘合送柩還 舊志

彭希旦字立元性孝友仰事俯育悉資館穀督學查以色養因
心清貧嗜學獎之給學租三碩優禮焉天啟間貢入太學未
仕卒 舊志

汪觀字集珍府掾吏崇禎丁丑楚寇攻袁城造雲梯欲上觀夜
緇城下斬梯寇退戊寅詔舉將材郡守解經達以觀應授欽
依守備管安福營兼攝二妃廟管官三載以養親告歸癸未
窩寇破城知縣月中桂請兵會勦委觀運糧作鄉導事平上
聞復職以母年九十餘不就 舊志

王試勳字銘常父鼎相邑增生構書舍於廣報觀左課督最嚴
試勳由歲貢任都昌訓導課士有方陞河南息縣教諭值張

獻忠亂率諸生防守龍門有功經畧楊嗣昌委署新蔡篆士
民德之 舊志參府志

李棟字若木舉人有孝行篤友誼築室貯書訓族子弟周貧濟
困著有節山遺稿 采李志註補

張列文廩生崇禎癸未賊破城獲列文強之入山不屈遇害子
經庠生見父死罵賊亦殺之時監軍道巢贖聯云盡孝盡忠
熱血淋漓芳草是父是子英魂笑慰泉臺崇祀忠義孝悌祠
舊志參省志

皇清

辛敏芳明韜子幼穎異能文年十二因累代父質訟知縣韋明

傑一見竒之命題面試援筆立就旋遊泮食餼順治丁亥竒
荒多方全活見露骸輒瘞焉生平積書近萬卷皆手自校正
欲剞椽以藏之會疾卒不果 舊志參府志

王事字惟勤丁亥竒荒煮粥濟饑石亭橋圮構木重建路拾遺
金坐以待還構書舍於太和觀篤志教子年八十六卒子言
字文人磊落淵博垂髫遊泮奉繼母以孝著康熙十五年學
使邵取准入貢適寇氛正熾未獲領咨士林惜之 舊志

辛映斗字鼎卿幼孤依母甘氏成立由縣府吏克布政司西通
吏經理各郡錢糧以勤敏練達給冠帶順治十年隨藩憲莊
僉憲安入覲

世祖章皇帝諭陳地方利弊斗卽將袁瑞浮糧上陳兩憲深然之遂
疏以聞部駁往復檄查宋元古額以徵冊兵燹無存乃據志
書詳覆院允瑞請而袁獨被駁斗憂甚捐金三百爲勾當費
始得比較新喻科則申詳題奉

恩旨汰減使二百年民困得以稍甦皆斗力也迄今子孫蕃盛立祠

祀焉 舊志參汰減浮糧始末

袁端字以人歲貢生博學好古善詩文與宜春易嗣重梁佳植
何山梁巨植本邑周顯輩讀書郡城以力挽文風爲已任士
多師之 舊志

郎萬象號鼎梅性好善嘗修花橋橋遇荒施棺粥以濟貧乏有
鬻妻子者揭貲代贖順治十三年率男士選士達士逢捐金
五百有奇重修聖廟事報部院春秋兩祀永頌胙焉知縣梁
大年額獎之卒年八十三士選字簡在性誠慈與二弟讀書
飲石齋年逾七十猶手不釋卷以明經終孫邦泰庠生乾隆
乙丑歲饑經理賑荒全活甚衆 舊志

宋繼種號育川父良璜穎異能文善藻鑒邑中推爲文尺義方
最嚴每攜之應試途間命題行文一里一藝腹稿而歸錄焉
七旬時父子四人並列前茅學使趙有一家相知之稱繼種
卽以是科恩選肄業成均丁酉登賢書庚戌中明通榜戊午
大饑倡領官銀輓粟以濟子希陳舉人 舊志

譚經國字定之祖德光以典吏改省祭素稱純樸父嘉棟增生
母病躬侍湯藥廢寢食者浹旬丁亥奇荒施粥濟饑存活者
衆嘗作功過錄五思箴年八十七卒經國精明有幹才由歲
貢授樂安訓導甫入境寇陷城知府陳洪諫委署崇仁學與
知縣陸呈祥共嚴城守寇不敢窺知府以其功上之和碩親
王安賜袍加紀錄次年署東鄉學寇圍城幾一載文武皆議
出避經國獨力主嚴守城獲全邑人頌功紀石至丁巳樂安
城復乃還本任繕城葺學查荒絕建義倉調編審立儒戶多
所建明有媒孽影射者爲力雪之保全不可數計

志

舊志參府

汪中元字一仙家貧力學偕兄弟十餘人講習善垂書屋學使
侯峒曾賞其文奇古贍博郭都賢稱爲曠世奇才與何山袁
繼梓周顯輩交遊及門者甚衆所得束脩以供菽水毫無私

積由歲貢選學職未任卒

舊志

辛金貴字玉友父奇策庠生性好施不苟取嘗拾劉德九遺金
二十兩卽還之建且息亭於楊公嶺烹茶以飲行人修半升
米沖石橋舉鄉飲金貴其長子也以康熙歲貢任德興訓導
時羗寇兩次陷城同知縣凌希聖曲諭招撫寇感其誠皆投
戈泣服饒九道李芳春嘉其功重之知縣張委詣鄉查荒熟
不事苛擾民困得甦長子汝礪邑庠生天性醇樸非事不履

公庭卒年八十六次汝梅亦庠生揮霍有才甲寅戊午間兵荒相繼人多死徙竭家貲招集賑貸保全無算年逾九十五代具慶知縣許松佶嘉贈之

舊志參府志

敖璉字宗玉少孤育於舅氏事伯叔愛敬兼至甲寅寇擄民間婦女璉爲贖回保聚甚衆由舉人官瑞昌教諭月課諸生捐俸給酒食優者旌之士多感頌孫化龍武舉

舊志參府志

楊勳字克成歲貢少孤事母以孝聞居鄉務以德感人堪輿吳獻吉壤乃鄰湯某荒山勳憫湯無子具以告吳愠甚勳曰此人倘有後吾快心矣何必身享其福康熙甲寅之變堂姪二寇害其一又擄其季勳密贖回以續弟後總鎮趙督兵勦寇

民烏獸散勳先輸穀草懇給招撫文趙允其請於是逃匿者漸復卒皆保護安全之選奉新訓導以疾辭卒年八十二子

三長名廩生次善歲貢任饒州訓導淹通經籍爲多士師資

季言舉人孝友謙恭教家有法

舊志參府志

袁秉星字秀也庠生自良人父早歿事寡母以孝聞忍讓少弟撫孤姪如子爲人排解不惜傾囊尤正直有幹畧甲寅兵變副將陳素綸鎮萬聞其名諮以方畧給令牌俾安輯地方秉星團聚戒飭有法山寇不敢入其境好獎誘人才月課親族子弟給紙筆膏火競勸於學卒年八十七次子師亮庠生有修竹遺草孫建中曾孫廷鼇俱舉人另有傳

舊志參府志

李國幹字汝翼白良人愿樸多隱德甲寅之亂寇擄婦女數十
置幹家令主守幹乘寇出悉縱之幹亦逸去寇焚其廬教弟
成名不辭勞瘁年九十卒曾孫治中廩貢來孫承烜舉人

舊志參府志

彭璧字秦求穎異多豪舉十三遊庠甲寅寇變率族弟贊八練
兵以禦非常知縣吳深倚之告免族中虛賠上高錢糧訟豁
本邑尾欠部費及災傷火耗後以歲貢官南昌訓導勸課有
方搢紳多出其門同寅何觀國卒於署璧爲營辦歸葬年七
十七卒尚書熊一瀟爲之傳

舊志參府志

郭士珮字公瑜父一伋庠生見人危急與古蹟頽壞不惜傾囊
以助士珮謙謹不設機械卽盛怒無惡言父歿友愛幼弟數
十年如一日由歲貢任清江訓導自奉淡薄日以力學敦品
訓諸生孫鍾秀武解元曾孫洪武舉另有傳

舊志參府志清

江名宦傳

宋希賢字象之少孤事繼母以孝聞康熙舉人任清江教諭獎
勵廉隅克振士習巡撫白潢捐金萬兩修清江長堤命賢董
其事委以刑杖俾策惰民賢至誠開諭未暮告成巡撫旌以

金帛

舊志參府志清江名宦傳

高捷字得先其父廷祐嘗路拾盧達遺金坐待還之有捕獲盜
牛者欲溺諸水力阻得活年八十五卒捷孝友撫兒子如已

子好學不倦康熙間歲貢爲文力振衰靡邑知名士半出其門立品醇粹有先民之遺子愈謙訓導另有傳

舊志參府志

龍文炳字嘉猷康熙歲貢先世累以利物濟人爲念祖兆璜舉鄉飲精堪輿岐黃之術鄉里沉痾多應手痊父星順治舉人課炳最篤炳博見洽聞嚴正不阿無厲言屈色人自不敢干以私邑中大事如清釐學地深倚爲重官安遠訓導時有持百金求舉孝行者切責之却其金平生著作甚富所作安遠

修學記刻於石

舊志參府志

宋希陳字東尹繼種次子博學能文章少從處士熊頤講學閣皂山盡得其奧肄業豫章書院受知於巡撫宋犖知府胡應

麟延爲昌黎山長中壬午鄉試宋至視學兩浙聘同衡文命子弟皆師事之嘗戲限寸香作制藝濡筆伸紙香未竟立就超拔瑰瑋洗盡時俗脂粉氣著有四書講義作文譜應制律體作法通解北調曲等書惟不負軒制藝梓行新昌漆紹文銘其墓

舊志參府志

彭元升字彥伯小字外少穎敏過目成誦童年隨師賀巨室聯句盈庭師歸詢之隻字不遺時有外夫子之稱爲文清真雅健曲邃雋永中壬午鄉試愈折節讀書閉戶猴腦山三年學益富著有燕石集太史潘述祖爲之評序

舊志參府志

巢廷魁字克占舉人勵志學業善誘人才與辛聯昌彭元升等

相鼓勵知府葛繼孔延為子師署內陶思淵出文稿就正衡鑒精當陶深服之後陶聯捷入詞林 舊志

辛聯昌字殿開舉人性孝友父病篤計莫知所出剗左股雜他肉以進病遂瘳刻苦讀書經指授者率有聲於時所得館穀置產分給諸弟喜作古文雋逸疎爽曲透物情成一家言知

縣施昭庭重之日相談論未嘗以私干 舊志參府志

張明德字本初號橋亭舉人考授內閣中書性端嚴不隨俗趨讀書每令家人鑰戶為文章苦思咬髭鬚指甲殆盡埽絕陳言力追古作者康熙辛丑試禮部人有關節貶者拂然曰吾文自當售且以此進身奈何卒下第作詩百餘篇寄其友死

於逆旅著有齊治通書藏於家 府志

辛金澄字三登邑廩生幼穎異為文精悍力矯浮華詩古文根

據經史雄渾奧博邑宰吳自肅得其試卷大喜旋為督學邵識拔為人淡泊寡營矜然諾不爭外飾與同志宋希陳龍文

炳及弟金衍文行共勵名其社曰兼修辨論學業洞析奧窔希陳稱其待友誠待戚和蓄僮僕義謂古拙自愛如夏鼎商

彝令人不敢褻視易簣時遺令勉內外孝友戒用僧道衣被從儉約卒年五十一子汝獻別有傳以曾孫從益貴賤贈資

政大夫光祿寺卿 新輯

辛汝獻字古才雍正癸卯拔貢少失怙恃子身持喪如禮事大

高車與志 卷二十一
母劉與繼母高咸得歡心每具養甘旨必豐已茹菜而已爲
文溫醇雅潔日可得二十藝學務實不近名同輩有聯名誇
聲氣者淡然不屑也邑有公事隨力贊襄尤急於宗支再從
弟某世單丁不能自存爲之婚者再又從叔某老無子膳養
終其身乾隆乙丑任湖口教諭初謁廟見崇聖祠在禮門外
請於巡道李根雲議倡修并修殿廡明倫堂如式邑進士某
以小故戚屬興訟尺書喻之和好如初生員葉某兄弟爭產
母溺愛弟以不孝訐其兄開以至性咸感泣拜而去先是卜
修文廟旣得日有言不利於司鐸者笑而不應竟卒於任年
七十一以孫從益貴累贈資政大夫內閣學士兼禮部侍郎

參府志

辛金鑑字又章歲貢勤學問敦本實嘗自作家規朔望集子姪
聽講任石城教諭捐俸倡建義學士子以文謁者批閱不倦
士甚服之卒於官爲立主祀義學中

府志

郭岡字鳳梧拔貢生充正紅旗教習任江南泰興知縣下車興
學校蛟出壞民田廬捐金賑卹委賑寶應水災飭保甲註賑
冊令白標饑民字於門親詣查勘自是不敢冒領亦無漏澤
調華亭令革鹽當陋規清理陳案無留獄卒於官倉穀霉爛
士民呈郡代補并賻之以歸子開英舉人另有傳

參府志

楊維鑑字希古歲貢幼孤力學喜作詩古文詞尤工八分書授

長寧訓導教士有法所著有四書理解方伯湯聘視學時會爲之序又著田寮文集八卷知縣江元璐甚稱之

府志

辛顥字景淳號道崖舉人自幼醇謹比長恪守程子四箴聞朋黨戲言輒掩耳疾走率諸弟肄業學舍月三四歸省父炳文有氣喘疾顥負行堂廡率爲常父母愛之懼其體孱好學常靳其膏油顥竊私益之夜分達旦不寢當兀坐沈思時身外無覩有竊其几案間物弗覺也鄉捷後越五年卒

府志

王家塾監生家饒好行其德嘗捐金立義塚於茶山造高城渡船置田爲久計乾隆八年米價昂貴傾積穀百餘石以賑饑者復捐金倡平糶施綿衣千襲助修文廟及文明塔創高城

社倉并捐以穀布政司湯旌其廬

府志

辛繼攀字達侯歲貢有孝行爲諸生日過市汲水以養親嗜古力學平居無惰容尤嚴義利之辨人有邪行不敢令之知讀書馬腦山房三十餘年以詩酒自娛著有性理體要蒼崖草學者稱蒼崖先生子廷芝舉人另有傳

參府志

聞成忠庠生父老而失明母已前卒忠侍養不離左右從兄泰齡絕嗣爲立後置產又捐貲爲族子娶婦乾隆癸亥乙丑庚午間穀價騰踊忠捐二百餘金以賑族黨之貧者嘗建昌橋石橋及竹渡浮橋踰千金并置贍渡田卒之日聚諸負金者焚其券

府志

辛聯居早孤母王氏中年得瘋疾兩手不仁居無兄弟妻室貧無以養賣卜於市多奇中時過午不卜午後或樵或釣歸必爲母盥櫛凡起居飲食及浣濯掃除必身親之服養三十餘年未嘗少懈

府志

辛首亮名金岫八歲時世母新寡繼爲嗣家窘極受鄰傭以養不忍朝夕離母嘗浣衣於塘側歸覓杵亮見衣誤以爲溺急投水救之幾斃雍正元年寇亂將繫其母以要贖亮搶地哀求賊詢知其名曰辛孝子也旋釋之母卒廬墓三年亮將歿遺命葬父母側詳孝子傳

參府志

宋啟封字孟侯監生幼繼世父希商爲嗣逾年繼母卒年二十

餘繼父亦卒哀毀不異所生念不得事繼母延丹青圖之朝夕供奉嘗置田己子值後知其人與父有故卽還其田遇賑饑及大興作皆築成之邑推爲長者

府志

龍世嶽字維智有幹局而性甚篤至康熙間兵亂母及弟三人被兵擄北去不數歲母病歿輾轉音至逢望痛哭曰吾母無子矣生不能隨養死猶不能歸其骨乃盡鬻產問關至都門徧訪莫得其耗計窮泣禱於許旌陽祠忽一人過而怪之語之故卽其弟也引至寓所母主猶在二弟自外入愕然相語始識別抱持而哭已而相慶諸弟各有子婦不能脫籍獨負骨以歸隱之衣裝中飲食必虔祝比至家大會戚友葬祭如

禮可謂孝義矣孫鳳祥舉人另有傳

以下俱新輯

龍學宏字士魁庠生慷慨好義邑中利害事毅然身任鄉黨雀角至立解嘗爲故家子某完娶鄰郡儲某僑居萬負債欲出妻宏代償全其室且周卹之佃有逋租鬻媳者宏聞之慰曰若無然吾不取若租佃媳得不出先是邑學田多被侵蝕宏與郭邦藩具控院司奉清查爲當事所忌欲致之死學使李廉得其狀力救乃免雍正甲辰丙午學田所入不敷鄉試贖費宏賣己田給之家遂落子四次孔彥字俊仲十歲應童試知縣許拔置第一學使姚稱其文精深博大入隆萬之室與李榮陞同以神童稱在學六十五年屢薦不售以年老 恩

賞舉人

郭邦藩字宗臣歲貢生有幹材遇邑公事人多遠巡獨以身任學田久被侵蝕邀龍學宏控奉院司清查邦藩按冊稽勘使隱占無所遁雍正九年部檄補丈報墾邦藩徧勘荒确以難墾力稟藩院獲免丈額征仍舊闔邑始安任崇仁訓導善誘人材以文謁者多所成就至今猶傳頌焉

高愈謙字益贊號遜齋歲貢生任新喻訓導課士有方家素封而好義憐從弟貧給田三十二畝以贍之雍正間與龍言各捐金五百倡修丁田石橋又立興江兩渡船捐貲置產歲取給焉屢舉鄉飲卒年八十二子蟾附貢生慷慨有父風嘗捐

金六百移建學宮孫秉鈞能繼其美值歲饑捐穀四百石助賑邑宰詳請咨部議敘曾孫湘文舉人任弋陽訓導

郭鍾秀字挺文號巍山武解元性溫厚識力超卓邑中大事如乞免陞科清理學基及攻訐鄒劉二姓冒籍皆不辭勞勩倡修康樂橋福壽橋子洪字九疇武魁負性磊落以學事未竟復與汪朝祖終其事卒成父志孫大賚乾隆武舉累官廣西義寧協都司安南不靖帶兵撲滅大猷甲辰歲饑與陳池鳳勸捐平糶全活者衆又倡建合族義塾曾孫鳳魁英鳳舒並以武舉官城守

龍長蕃字嘉言號嘯園歲貢生幼孤勤學居常嚴恪無慢容遇

事多卓識喜誘掖後進任玉山訓導課士勤懇無異居家時解組歸知縣朱崧舉鄉飲子學川亦歲貢生家貧好善嘗出束脩廿餘金給澄渡船費晚年選餘干訓導未任卒

袁建中字致和雍正舉人中乾隆丁巳明通官廣昌教諭拓修文廟值邑饑勸士民出粟賑之賴全活無算大吏廉其能以上考咨部學使趙稱其文如富人擁厚貲不作寒儉語兩充福建同考官子廷鳳由四川奉節典史陞冤寧縣丞創救生船置漏澤園卓有政聲廷鼇舉人另有傳

袁寬字繼安廩生英敏好學磊落不羣喜藏書流覽甚速爲文暢所欲言浩氣流轉建桂林書院延名師訓迪來學與同志

數人議建文塔於鄉事中阻因購基以俟邑中以公事就商者常座上滿修邑乘及崇文堰諸役皆身與其間病革時猶眷眷於堰工未竣得年僅四十五曾孫開慶舉人

王嗣立號銀山舉人家貧力學有文名知縣巖在昌聘主龍山講席日與論文課菘多所造就時院中膏火不給慨然出館俸以助之諸生勒碑紀其事

汪朝祖字岷山號敬亭拔貢與兄朝宗相師友年三十餘猶聯床不忍離觀書每得大意所作古今文風骨直追秦漢庚子鄉闈擬元旋失知縣施昭庭時造其齋談經藝娓娓無一語涉訟事雍正元年邑有警延與贊畫民得安堵他如呈免荒糧清復學基遷建學宮修康樂橋諸大興作並倚其力教諭魯鴻誌其墓曾孫元英舉人另有傳

辛汝勤字翼侯性聰慧肆力詩古文詞兼工行草求詩與字者日踵門口吟手揮落筆飛騰其才思敏捷流輩罕有及者以拔貢選宜黃教諭端已訓課多士傾服數年告歸著有丹崖集藏於家

張崇德歲貢生任南城訓導甫蒞任見聖廟兩廡傾圮捐貲修葺復築數椽於學宮右爲諸生講習之所賴以陶成者甚多至今跡猶存

辛琚字璵善居積而勇於行義卹孤賑饑疊疊不倦任浙江

杭州稅大使清署基建公廨兩解京餉題辦北新鈔關事盡
弊皆絕爲沈春源等請減科稅商人德之爲立惠商碑焉十
載告歸爲善益力四舉鄉飲年八十三卒子衢由監生截取
州吏目性伉爽義聲四溢邑議修學博士齟齬不可衢商首
事召匠立撤舊寢修虎塘王家山橋不吝費承父志修龍江
石橋糜金累萬制軍高嘉之檄縣詳請議敘固辭不受孫炳
喬優貢另有傳

汪有燦字繼明廩貢生候選訓導風度卓越有學識嘗出已田
爲堂兄立後邑有興作及歲歉不惜傾囊以倡崇文堰築復
圯有燦捐金二百有奇偕同志修復耄年尤切觀光乾隆壬

午乙酉恭逢

聖駕南巡兩次獻詩賦

恩賜銀牌綵緞黃衣精光奕奕爲一時人瑞

胥袞字補之郡增生仗義疎財修康樂橋遷建文廟皆捐貲爲
倡乾隆二十四年捐矮楊樹柴仔阮田四百六十五把助龍
河書院膏火知縣張立中守備沈瑄並獎之舉鄉飲年七十
九卒

劉大瞳字東上邑增生樂善好施丁家橋圯捐金數百爲倡前
後獨建石橋四甃道路不計助修文廟大佈賑古墳鄉某利
其無主欲毀爲屋基瞳力止之里人有貧出妻者予以貲得

復全年七十卒孫馨蘭曾孫英俱武舉玉遊歲貢

聞儀字百千邑庠生莊重寡言笑至性惻怛惟以利濟爲心憫竹渡橋圯行厄於渡思復舊而苦力詘謀諸牟村辛金壽擇於古橋下游捐貲同建計萬餘金視舊制加擴焉往來便之周繼德自祖爰試分產讓肥父志垣與叔志翰未析產至繼德復克承志長幼百餘口同居共爨延及六世家規整肅子姪各有本業每食內外設廣席尊卑序坐未十歲者另設小席亦分序列相揖相讓有一未至俱不先食乾隆五十年題請旌表義門建坊祀忠義孝悌祠

辛金壽字天賜性慈祥好義乾隆間偕聞百千修竹渡石橋偕姪家松修牟村大橋庚子圯於水偕姪重修之癸亥歲歉出無利穀數百石以貸貧者不責償壬申乙酉屢減價平糶施棺木棉衣歲無數紫蓋庵洪塘庵割田山以助爲族長捐買屋基以擴宗祠倡族糶公米生平捐金粟不下數千舉鄉飲年八十六卒以子家柱急公贈儒林郎姪家松字煥榮捐職州同好義與金壽同如修竹潭橋歲施棉衣皆捐金以助至牟村大橋則與金壽鼎力修成圯復修道光二年橋被水復壞其孫克承先志加重修焉

李啟華字紹尹郡庠生端方正直舉鄉飲時濟窘乏或借貸不償卽焚券聞鄉人黃某貧將鬻妻給銀穀贍之黃遂止又倡

捐腴田百餘畝爲族祠祭祀之資嘗以青溪爲往來要津囑子俊秀貢生泰洵費金千餘而橋成曾孫宗彝舉人

楊維鏞字金奏少負才名勇於爲義捐腴產十六畝助龍河書院膏火爨近城道路倡修大江洲浮橋子之洵綽有父風歲饑偕同志買穀以濟倡建文昌閣筦理學事備矢公愼偶因公事貸多金鬻已田以償合學頌之次子叔度以孝聞性和而介讀書自娛非其人不相晉接與之洵朝夕怡怡構書室延師課子弟凡邑公事非關學校不與聞惟建試棚及建賓興踴躍勸輸而樂觀其成焉年八十五卒

郭邦城字宗國邑庠生性端嚴然諾不欺邑有興作如遷建文廟倡修文昌閣築崇文堰多倚賴之乙酉歲饑倡捐平糶在宗族間倡建義塾助支祖祀產又捐田爲族人立後教諭趙由義稱爲好德不倦

汪發楫字濟川爲名諸生具才識勇於爲義倡建文廟六載勤勞遷龍河書院皆身任其事筦學事多年有冒籍跨考者力攻訐至鬻己產以償諸費士林仰之居涂泉與辛廷芝詩酒往來嘗偕李榮陞遊廬山附糧艘入都到處題詠著有鷓峯詩草藏於家

郭治清字季淑邑增生後叔父爲嗣事所後母孝養備至爲請旌建坊敦品績學不涉阿私庠序中羣倚爲重時邑諸廢未

舉如遷建文廟築修崇文堰移建龍山書院悉治清遼同志
倡督之常公講堂圯復借貢生辛汝岐捐建學宮之右家非
素豐而勇於爲義知府陳廷枚額獎之子光笏歲貢

鄧鉉字振永優增生博學有才識尤慷慨好義過邑公舉不惜
貲乾隆十八年捐百金倡建文廟三十二年助修

上諭亭崇文堰築旋圯者五鉉續捐工始竣遷建吳公講堂重新
城隍廟修花塘橋皆捐金爲倡巡撫吳檄州縣查丈田地山
塘科則分別徵輸鉉集紳耆具呈縣府申詳免丈并捐幹辦
費迺得照舊徵輸免增糧之苦性好梅嘗做芥子園梅譜寫
之筆意工妙自序梅花十景詩傳世

周繼盛字景中庠生醇謹厚重悃悃無華居家孝友內外整肅
承筮學事公慎自矢乾隆初遷建學宮鉅細經理以身任之
不辭勞勩工竣後捐田三百七十把爲贍學費又捐田一百
把助龍河書院膏火兩庠靡不歎服子南歲貢選新建訓導
未任卒

王都毫字正萬號兩山舉人父三顧邑增生爨饒田瀕江路毫
博極羣書爲文廉悍得力於柳州半山詩古抒寫性靈機趣
洋溢旁精醫術地理家言勇於爲義振興宗族昆季競爽時
有九萬齊飛之目而毫尤傑出

王都建字封萬號南星都毫弟歲貢生品端學遠爲知縣巖在

昌教諭魯鴻所器重擇董學事輕童試卷價與鄉會贖費士林欽之兩舉鄉飲子昌仁恩貢另有傳昌義歲貢

王都會字同萬郡增生都毫弟篤行孝友洞達機宜邑事每藉以成邑侯張慕其爲人嘗過訪語不涉私龍河浮橋久廢獨力倡舉並募產爲修葺計中丞陳榕門爲立序後值移建吳公講堂將其田助入以資膏火

巢起岐字天作號西堂讀書極淹博狀貌魁偉兼有勇力縣府文武並試雍正戊寅學使至郡先試武童遂入泮乾隆元年中武榜官江南淮安衛千總署大河衛守備生平放情詩酒閒臨古帖於易義尤精通鴻臚寺卿袁芳松嘗延課其子著有西堂詩草

辛廷芝字秀圃舉人善詩古文辭精書法教讀邑子弟成材者衆倡移學宮與修郡志凡邑諸大興舉倚之以行任金谿教諭倡建試館以老告歸諸生攀留奉衣繖祖餞題曰世範人師著有周易解四書解作文譜詩草文章待梓

辛汝岐字化南號敬亭歲貢生性醇謹不妄與人事亦不妄與人交知縣楊長佐雅重之嘗勸之仕答曰教官亦宜勤職姑守吾疎慵可乎家頗裕柴田福壽橋爲往來要衝圯於水獨力捐建涉者便之遷建文廟及常公講堂頻出百金以助又割田四畝助吳公講堂

郭吉字敬勝號謹齋監生性謹敏喜讀通鑑綱目與人論列前代得失聲譽不竭勇於為義遇邑中造橋發路不少吝尤倦倦於學校歿時囑諸子出金四百葺崇聖祠田千餘助賓興并捐田助義塾膏火大吏以建坊題請

旌表樂善好施子如棠如崧俱中武科如崧官守備署台州衛徵減糧價民德之洊署濟寧衛值滑匪滋事招撫流亡按口給賑大吏稱其廉能如泰官長蘆鹽大使以明慎保舉擢知縣劉景暘字定翰監生天性純篤事母以孝聞幼孤貧常採薪供菽水後勤儉致富慷慨好施每歲暮察鄉鄰乏食者予以穀不取值凡邑事有濟於人如置渡給棺諸舉悉力為之郡伯

張五緯額以樂善不倦彰其德也易簣時以義行勗諸子三子崑捐金千餘建郡試棚季子時耕佃儻有大節育嬰堂及試棚皆襄理其間邑建賓興諸孫共捐田四十畝有崎克守遺訓焉曾孫文毅舉人

龍雲飛字在遠號翥軒聰穎力學從楊維鑑遊嘗終夜不寐師見其體弱頰戒之然不為少止弱冠時縣府院三試皆第一乾隆庚午舉於鄉文名噪甚下第歸旋卒時年二十八人咸惜之

巢起崙字有源乾隆癸酉拔貢壬午副榜選金谿教諭病未赴胥次卓犖無塵俗氣學深博尤精宋儒家言邑中宦達多出

其門偕同志遷建文廟移建吳公講堂一時興作咸倚重之
著有滙堂文稿孫象彰舉人

李榮陞字奠基號厚岡幼穎異稱神童乾隆進士知湖南永興
縣有政聲內艱服闋挑發雲南署雲州攝緬寧通判京銅差
竣補呈貢以案呈議仍發原省署恩樂補署我宦滇十餘年
所至修義學獎人材民不忍欺屢校鄉闈所得皆知名士引
年乞休當道延主大理書院一時文風丕變生平嗜學於書
無所不窺攷論折衷出以虛公實有先儒所未發者著有易
攷尙書攷四書細論地理攷三皇彙攷古今體詩文集江督
費淳序梓行世禹貢山川攷學庸攷年厯攷論孟類孔聖攷

孟子攷濟水辨國風解地脈地圖說遊歷稿運銅記滇南花
卉記沅江三錄諸稿藏於家三子光宁監生古道自持精形
家言尤通六法年逾七旬襄輯志乘釐定境內山川脈絡并
廟署書院試字俱手繪圖瞭若掌文

龍鳳祥字文彩號順齋天資穎異經史子集靡不通曉世居田
北村旁有麝洞構麝腦山房披吟其中所作詩古文詞悉有
奇氣與同邑李榮陞齊名工書法尤精篆刻乾隆己卯舉於
鄉官滇南雲南知縣解餉緬甸以軍功擢知賓川州尋運京
銅因舟覆呈吏議卒於伊犁戍所著述散佚僅郵夢禪詩話

一冊梓行

張焜圭字輯瑞明德子拔貢成童冠縣試軍方樸山稱其文似
李石臺中年學益邃直入章羅之室邑人爭以文就正凡經
指示者悉有法度居平以盡心養性爲要嘗曰言行循乎天
良勿務穿鑿便是良知良能許大事業俱可行所無事和友
云歲月消磨仍故我性情怡養見真吾亦可想其梗概遇邑
公事每玉成之而不身與其間子作翰歲貢

周日禔字啟之天姿卓異讀書有過目不忘之稱鄉中諸士多
出其門以歲貢爲鉛山訓導與諸生講明經義月課必親批
閱文風爲之不振見學宮兩廡頽敗捐貲倡建鉛人德之解
組歸值祠宇遭回祿慨然出館穀捐修易簣時惟以讀書囑

子孫餘無一語

宋嘉麟字鴻作庠生孝友出天性家無儋石事父母菽水養志
兄弟五人分謀衣食有無共之每臘歸必歡聚祠內購薪作
食高歌酣飲風侵敗絮擁爐爲樂至新正乃散幾忘各有室
也素喜吟咏到處留題撫軍吳紹詩以世誼故欲賙之輒以
安貧辭友人爲構松莊以居日事著述翛然物外善誘後進
及門多所成就

喻士標字名魁號南亭監生乾隆間任安徽歙縣丞委解軍餉
赴甘省大吏稔其廉幹檄攝邑篆政治有聲告病歸生平仗
義曾捐銀三百二十兩助建學宮捐銀四百餘兩倡修蓮溪

南園石橋乙酉饑復出金百餘減價平糶多所全活年八十
一卒

郭如岡字鎮南郡庠生事繼母以孝聞喜交文士遇人緩急無
少吝乾隆乙酉甲辰大饑捐金三百倡平糶凡邑公事如建
郡縣試棚葺崇聖祠修迴瀾萬歲等橋前後捐輸不下七八
百金族建義塾捐金五百爲倡又捐數百金奉其祖配祀族
祠小宗祀產被典賣捐貲贖回族姪開英滯京師贍其家十
餘載迨挑發陝西猶時郵金爲旅費家庭中讓肥分礮嘗以
義行訓子孫次子樹藻庠生四子樹芝附貢各捐金千有奇
襄建文昌宮又捐助賓興俱克承其志云

辛樹人字民安幼英確試輒前茅嘗受知縣尹嚴在昌試藝傳
播李榮陞見而慕之適入城壽其舅張客且闌屏營門外曰
吾待晤辛君也欽遲不至悵然久之其爲同輩傾服如此隨
父汝獻湖口任所師友知名進士黃椿榮曹天瑾周仁棟爭
愛重之邑教諭魯鴻得其文詫爲縣所僅見年踰四旬補諸
生已而引劄貢成均非其意也始其父督望勤至自維昆季
三人列官牆父皆及見而已獨後卒時遺命斂以藍衫將服
以見先人地下至性過人於所生造次不忘生辰茹蔬果未
嘗受觴酌風尚節儉家稍豐被服仍布素或以華美進曰吾
非不辦此然先人所未嘗服也吾何安乎先是父汝獻以再

從弟某支將絕嘗一再爲之婚以有遺孤至是微甚乃復爲授室有五子焉生平不以絲粟累人每開歲市人登所售物主者於冊必首其名以爲吉利家世矜佩自以久困小試課子尤切孩抱時卽令徧識壁間字諸平仄對語暨破承未入塾已習之稍長晝庀事於外暇卽口授經注古文每隨行侍立伴臥輒令背誦稍偷渡輒覺故諸子並以幼敏聞教使然也子又曾以縣首入泮炳晟乙丑進士從益庚戌傳臚以從益貴累贈資政大夫內閣學士兼禮部侍郎

盧謙字益侯邑增生敦行孝友親喪守家禮不作佛事兄艱嗣爲置兩簷室因得子嗜學能文著有益侯稿屢薦未售至老弗懈壹志以詩書貽子孫易箒時囑以所遺莊田五百四十把捐爲賓興公貲子爾彩監生爾彬克成其志孫毓奇監生性伉爽亦能承謙志聘名師教子遇邑義事不憚艱鉅不吝貲財丁卯偕同人赴金陵質考案詞不屈其會孫文宏庠生亦與有力焉曾孫燿舉人元孫昆鑾進士現任浙江臨安洊調石門海鹽平湖知縣人皆以爲詒穀所致也

辛家棟字德輝貢生性仁厚仲弟無嗣以子後之季弟歿撫其子女均以已產旁及堂弟兄分給田宅百餘畝堂姪孤露爲擇配給以產有李某親老饑寒且負逋謀出妻家棟聞之代償逋并資粟帛得完聚分宜舉人趙被淹滯都門付金龍鳳

祥俾得歸養孀母乾隆庚子邑饑出錢粟賑之乙巳青黃不
接又出粟千餘石減價平糶族修支祠捐金六百以齎其事
凡邑公事靡不慷慨捐輸卒年七十

李珽字德如附貢生性豪邁自奉甚約遇公事傾囊不吝嘗偕
同志倡建蓮亭石橋歲歉出粟平糶貸難償者輒折券與之
晚以義舉未竟囑其子續成蓮亭橋助修南園萬歲等石橋
又捐修郡學大成門名宦鄉賢祠及本族宗祠近又輸田八
百把爲賓興公產先後解橐凡數千金皆承其志云

陳鼎龍字建侯邑庠生性孝友庭無間言修家廟置祭產建家
塾撥義田筦學事九載備夫公愼屢葺學宮增貧士膏火及
鄉試費甲辰壬戌邑大饑邀同志出粟平糶全活者衆過邑
公事如稟免丈田以身任之建考棚修城隍廟水府祠及橋
梁道路無不倡捐嘗念文昌武曲邑無專祠屬子若孫捐金
千餘襄建文昌宮割產助賓興并助建武廟卒年八十有八
以子貴封武畧騎尉

辛樹錚字勝音貢生少有至性友愛弟兄喜與文士晉接家不
甚豐好施子乾隆乙卯邑大饑邀同志平糶遠近賴以濟遇
族中修祖廟建義塾以及鄉村橋路諸舉悉力贊成有族某
虧社倉穀迫於公議而力窘慨以已穀償之有僧某爲勢家
追蹙出橐金以解年近八旬市貨吳鎮過樵舍舟猝覆同人

俱滄斃樹錚若有物憑之出得無恙人咸謂厚德所致也卒年八十七子聘三現任太湖廳東山巡司

郭世華號禧堂職監生孝友出至性幼失恃祖母逾九旬癱瘓在牀服侍左右溲穢手親滌兄無嗣以子後之弟析箸產蕩盡復攜同爨割已田以助弟歿撫諸姪悉完娶養贍生平恥涉訟有侵占者輒予之喜接文士構屏山書屋課子姪并倡建石溪書院教族中子弟積穀濟鄉鄰每歲晏減價糶遇荒貸不計償施茶給糶以爲常凡邑義舉如修龍河橋惜牛施棉糞路靡不倡捐任其事嘗偕同志置田供帝君香火以無專祠囑子出金千餘倡建并捐金助產襄建賓興子大經進

士仲季公庠生以長子大經仕封文林郎年八十四卒太史

謝階樹銘其墓

宋寶字瑤崑監生父拔中武科諳制藝有志賑荒嘗捐穀三百石倡立義倉寶席父費好吟詠書法工懷素自奉嗇嘗曰龍河書院文昌廟皆邑公事也吾將積金爲之後因事羈於外逮歸齒已暮矣病革時以其事屬於子子海嶠方整治橋路未遑卒孀媳聞氏挈諸孫承其志次第畢工學使李宗昉及邑人幸從益並爲記程中丞獎以聯額並題請

旌表樂善好施建坊闔門書院肄業生念其功不可泯也白當事立木主祀之

陳邦梅字春魁監生孝友敦厚慷慨好施邑建崇聖祠葺城隍廟建試棚育嬰堂及朱溪柴田石橋本鄉真君廟諸義舉俱捐助不吝遇歲歉輒出穀平糶鄉里感之又輸二千餘金爲本支建家廟晚年撥遺業囑子孫遇城鄉公舉務出貲助孫彬采字素書監生亦明大義適邑公事厄於費獨挈已貲數千金始終其事卒賴以濟士林重之

辛金銳號北墅由歲貢任義寧州訓導品潔學裕敏迪有方鄉賢黃山谷祠代蔭一生嫡裔貧無所資有力者欲奪之金銳持不可州人士雅服焉年七十一卒於官

辛邦佐號紱堂歲貢生少穎異八歲日誦千言稍長閱書輒解悟通作文法家苦貧日出採薪供爨夜就祖龕燈展讀房兄某見其勤敏攜入塾叔父某資以膏火益感奮力學知縣嚴在昌拔冠縣試旋以第一人食餼自是屢魁其曹詩古文並適勁工書法得率更意度擘窠大字尤蒼健遠近求者無虛日晚年主講龍河書院從游多所造就

王昌仁字應元少力學能文章童試時戲與李榮陸抗手賭第一旣而各冠縣府軍旋食餼以恩貢官峽江教諭訓課勤篤名士多出其門居常孝友偕昆季七人朝夕切劘仁尤醇厚多義舉嘗邀同志建因心堂以施楫歲譏勸捐穀平糶及修崇文堰禁屠牛捐渡產皆與有力年九十一卒子定禔至性

過人母病截指瀝血和藥以進病遂愈孫敬敘歲貢生

辛炳昭字能濟號熹亭歲貢生性純孝事祖父母本生父母及所後母先意承志俱得其歡邑中公事如賑饑建試棚修聖廟贖春秋闈皆身任其事筦學產十餘載稍羸即增鄉試贖費生平廉靜寡言笑中年喪耦義不續娶作文醇正類其爲人嘉慶改元舉孝廉方正縣府儒學爭以炳昭應已上大府固辭不赴年七十六卒子紹業進士另有傳孫僕舉人

辛錦斐字衛瞻號淇園性豪邁由庠生授衛職不仕歷遊吳楚間旣家居助建蓮溪柴田石橋時掩骼埋胔散給棉衣值歲饑捐金倡平糶如是者三辛氏義塾出腴產以助凡城廂內外路不可行者悉次第發平不可勝計董育嬰堂事中丞方伯皆額獎之臨終以義行囑諸子子出金千餘襄建文昌廟輸產助建賓興孀媳郭氏復挈私產助賓興並捐私產助龍河書院膏火大吏上其事於

朝旌表樂善好施建坊南關子朝俊官知縣朝鼇中武科以朝俊貴封文林郎晉封朝議大夫年八十四卒

易大有字德成庠生狀貌俊偉喜讀書素與文士相晉接嘗購書延名師課其子伯仲皆文庠三子金鳳申武科成進士以營守備用充江西駐省提塘四子金麟亦中武科以金鳳加捐遊擊銜例封武翼都尉

宋謨策字身修監生性孝友素謹愿人無間言出金二百修祠
宇輸縉三百爲支祖祀費遇邑義舉無不樂成如修龍河橋
建試棚施棉衣及發路修堤悉出金以助嘗以文武廟未建
河渠淤塞爲念囑其子捐金千餘襄建文昌廟出產助賓興
復捐金五百倡建武廟捐金二百疏河道光辛卯壬辰荐饑
倡捐千數百金平糶皆承其志也以子挺申武科例封武德
佐騎尉

盧爾洛邑廩生有孝行親喪廬墓三年幼承庭訓淹貫經史著
春秋類釋詩文悉有真氣學博魯鴻邑進士李榮陞素與講
學歲科試屢高等進士陳池鳳推爲畏友年六旬學使趙佑
賞其文稱爲老宿拔第一梓其文老猶勤學旁通醫卜星葬
諸書倡修蓮溪石橋建上達齋以課子姪子及暉副貢生及
暄優廩生筦試棚產絲毫不染督學王鼎以品行端方獎之
克紹父志云

彭英拔字豈常幼習舉業未售性好施予歲製布禪百數十遇
體露者輒衣之見丐行風雪中或給敝蓋或箬笠以去宅旁
有西江橋修復圯擬易石梁而未果囑諸子成之費千金有
奇玆迴嶺黃田岡路八里許孫士模舉人

陳池鳳字鳴瑞號丹山進士早歲能文日可十數藝揣摩純熟
歸於精約江寧秦承恩侯學詩新建熊爲霖序而刻之卽世

所傳丹山稿也性孝友家窘甚養母必求旨甘兄弟諸姪衣食婚娶一身肩之歲取資於館穀嘗館南昌黃氏著四書廣義及門多所成就謁選授山東泗水縣教養兼勤如泗源書院添置齋舍膏火泗水泉池詳撥紳士管理及辦軍需購糶料挑濬運河散賑鄰邑皆以實心行之在官五載不名一錢囹圄幾空方伯康基田觀察孫星衍稱爲循吏純儒解任後兗州守聘主東魯書院誘掖後進孳孳不倦以疾卒士民賻之歸孫中實舉人

辛文彬字程材號質孚舉人歷署四川墊江鹽亭知縣補丹陵邑有劇盜史英役不敢捕彬下車設法捕治并窮其黨廓爾喀之役大兵過境民若無事眉州苦派累民騷控大府飭州牧倣丹稜法乃帖服調理巴塘糧務兩土司以爭坐位相攻擊開誠曉諭並感泣去比瓜代攀送不絕旋署邛州兼大邑所至寬猛相濟不姑息近名宦蜀十八載未嘗駁提一案陞賓川知州擢戶部主事以目疾告歸卒年七十三著有質孚詩集大庾戴均元序梓行世

郭開英字實函號霽園岡之子績學能文由舉人挑發陝西歷署鄠縣扶風均得士民心及瓜代扶風民詣制府借寇格於例時田逆不靖從大軍尅日撲滅當道嘉其廉能題授洋縣治獮黨植善類卓有政聲未暮年以勞勩卒士民哀之

孫馨祖字明薦號此堂聰俊過人能文章兼工詩古擅詞曲乾隆辛卯以第三人舉於鄉挑發粵西署蒼梧知縣有政聲以祖母艱歸服闋任福建甌寧分校皆知名士報最列上考大吏廉其材堪治劇調任同安以母憂去職因公卒於戍後歸葬著有此堂詩集梯田山人餅話昆都侖歌紅牛記諸院本藏於家

袁廷鼈字駕山號六堂建中次子舉人任樂安教諭修文廟倡置樂庠庄分給諸生鄉會資斧陞撫州教授尋擢福建知縣初署福清會歲祲發倉粟賑之復勸邑人平糶全活者衆旋補順昌分校鄉闈解首出其門以同安搶鬪檄調署浹旬案皆治辦特調晉江同安民詣制軍借寇不許抵晉任益銳意吏治詢求民瘼四載解職歸卒年八十四所著有閩王紀畧二卷嚮往篇十卷味鯖集四卷藏書紀畧四卷白良山房文鈔四卷詩鈔二卷白良述古錄二卷俱待梓

聞星杰字羽儀號松園舉人家貧甚事父母色養備至父歿諸弟俱幼教讀婚嫁引爲身任性和而介嘗中途拾十餘金待還之座師錢延入幕隨試粵西有以關節干者正色以拒官寧都學正以讀書端品爲諸生勗卒於署著有敦本堂時文二卷

鄧斯沂字浴儒號與齋以冠軍遊庠試屢優等器宇軒昂富經

史雅不自矜粹然有古儒者氣象指授及門一歸理法性樸實尤重氣節有某負百餘金故不償勞筆習追沂不欲以珠彈雀卒焚其券有爨夫某負債將鬻妻力禁之借及門助以金使完聚乾隆甲寅舉於鄉留京數載患病歸卒著有與齋詩文稿待梓

辛炳晟字融初號淑郵進士幼聰穎有神童之稱或詢以聲韻指示部分無少差長益邃於學六經子史旁及百家靡不淹貫爲文援筆立就如萬斛泉湧卽游戲之作亦臻神妙詩律雄傑力追少陵書法得顏柳之遺一時名宿如李榮陞分宜林有席新城魯鴻皆目爲國士應拔萃科時方弱冠學使蔣元益賞其經義詩古以爲得未曾有五旬餘始登第揭曉後持衡者知爲西江老宿咸慶得人銓縣令以親老改任撫州教授訓迪有方學者宗之卒於官爲人英敏磊落洞悉時務而恒自矜重遇邑大事則慷慨直前如建試棚輒身爲倡著作甚富有春秋輯要甘陽軒詩古文稿時文稿皆待梓惟藤石齋帖鐫行於世

辛紹業字服先號敬堂進士博研羣書治經尤精密不爲泛鶩矜異之說與浮梁鄧傳安齊名學使翁方綱有萬載浮梁辛與鄧說經奪席驚羣英之句選入貢旋魁鄉闈通籍後授國子學正陞助教在京十餘年日與翁討究經傳訛異及說文

金石諸集翁每立一說必往復商榷以決其信古文胎息韓柳詩尤得力少陵肄業者經其指授悉有法度意義可睹秩滿銓同知以疾卒於南學署翁輓詩有云老屋青燈淚誰能贖敬之其慟之深如此生平著述甚富冬官旁求彭元瑞見而激賞易圖存是周禮釋文問答律呂考九歌解古文詩稿俱鐫行世古文尚書冤辭辨詩經毛鄭權衡周官官聯表儀禮經注証誤春秋禮存樂存經傳車考古文同聲譜同形譜古字逸義皆待梓子候舉人

辛炳喬字朝嶽號月臺幼穎異博綜羣籍冠軍遊庠制使孫士毅觀風拔第一學使李鈞簡以優行貢成均大司寇熊枚宗

室瑤華道人前後聘之道人喜吟詠日與唱和先是鍵門南浦不妄交惟邑人李榮陞金谿王謨分宜林有席臨海黃河清等以書往來商榷古今繼厭城市移居郭村闢最秀園著書自娛其摘錄要義者有讀書割正編不可不知錄益智樓離騷解及袁州舊聞府志參攷其已成書者有周易玉海鄭注補春秋申議注疏刪緯讀胡繩崖通議讀田間詩學最秀園集俱待梓子承貽字立圃倜儻有幹材以讀書未售遊京師三十餘年公卿推重遇事關郡邑輒以身任有滯京告乏者每飲助之選直隸房山尉未任卒易簣時出千數百金命子持歸備祖祀費分送伯叔兄弟及姻黨貧乏者以襯歸葬

人多悼之

辛守身字斯申監生三歲失怙事孀母以孝聞待人和夷無所爭競惟事關利害得失則毅然無少徇勇於爲義有親朋窘託稱貸者輒力謀之甚或出私橐償其負支祠就圯勸輸鳩工以齋於成龍河橋爲城北鎖鑰勸捐督修公慎自矢他若惜字惜牛悉邀同志置產以贍後一時諸舉實倚重云

辛樹穀字庭碩爲名諸生孝友出天性善事父母及祖父母俱得歡心生平端莊自持讀書不求宦達以理學爲宗誠正爲要訓課及門必講求乎良知良能謂五經四子書皆闡發仁義禮智而莫先於仁實能抉道之根嘗刊感應篇陰騭文功過格集驗良方等書其救世濟人之心疊疊不竭臨卒沐浴端坐彷彿尸解人咸稱爲善士

湯舉字伯英庠生其父以倡修仙居橋家中落至舉益窘仍醵貲修葺素刊陰騭感應等書善排解有豪某健訟得其言卽釋館中爨夫貧甚將鬻妻舉偕及門助金得完聚凡鄉中修路施茶掩骼拯溺女無不樂從其事宜春庠生陳某來從學家忽遭回祿頗拮据舉飲食教誨視若已出遠近稱盛德焉

子薦馨舉人

辛啟泰字仲和號敬甫原名梅臣少負奇氣折節讀書爲諸生以詩文遊方伯廉使間未嘗干以私足跡所至喜搜羅金石

志乘文字邑中事凡關名教者必力爲之如赴部呈復棚額
雖中頗牴牾卒如所請主講濂溪書院拓周程諸賢祠增舍
宇加膏火虔士頌之由副貢充官學教習期滿發江蘇以知
縣用大吏知其能檄往徐州清理積案聽斷明允百餘案次
第立夫無不感服歷署睢寧豐縣江浦事所至以風化爲先
在豐時嘗捐廉修丁蘭祠爲民勸卒於江浦縣署著述多散
佚僅少時新畚集行世

汪元英字雋敏號春圃性豪邁作文有奇氣以優貢入都精形
家言不輕與人卜宅兆間走齊魯山陝所至輒紀名勝登戊
辰賢書因北上釀金增置京師試館會罷歸分編志乘釐定
山川脈絡瞭若指掌邑議建文昌廟及賓興堂艱於基率族
人以祖遺地售故賤其值而爲倡俾勞基得次第購就城北
川原曠散無關軸倡建文塔以培風氣雖人言弗恤其忼爽
任事多爲邑所倚署奉新司訓造就有方母訃奔歸急謀窀
穸捨踣風雪中葬母踰月哀毀卒時年六十四所著詩古文
秦遊草並藏於家

陳鴻翥號拙甫原名池鳳幼機警有智喜讀書從伯兄池鳳習
舉業盡得其規矩而能出之以變化構菘敏捷文名噪甚省
會宦達家爭延之以課子弟乾隆甲寅以第六人舉於鄉任
東鄉教諭勤於訓課於艾千子後裔尤惓惓及門多寒畯以

文謁者從不計脩金雖齋廚蕭然泊如也疾卒於署無力治殯具同寅及門致賻迺得歸葬著作散佚惟課徒文稿行於世

盧焯字位南號小山資性敏爽折節讀書能以神悟詩古文俱飄然有出塵想肄業豫章書院爲名流所推服居家孝友不有私財倡建祠宇貸累不少恤遇鄉族糾紛事力排解之時或出橐金豁釋登壬午賢書適丁母憂未計偕襄輯志乘建文塔邑倚爲重服闋北上道經臨安留姪昆鑿署中董建錦城書院勤課獎疾卒於署以櫬歸士林惋惜之

袁振藻字繪甫號素先幼穎異邑讀五經者間有刪節藻父課之勤授以全經藻日誦數千言爲文章性靈灑灑以幼童應試學使曹器之取入邑庠藻外和內介明敏治事忠信孚人每公事倚之爲重邑建考棚爲任事之始理財購產與同志悉心籌畫畧無虛糜終於建賓興堂倡率勞瘁事未竣而卒其中如修邑乘白良創來秀塔及一切鄉族公項鮮有不待其經理者先賢以學吃虧垂訓藻於此三字實心向往之故濟人利物之事時見於鄉黨云

辛萃字永之號惠生幼聰俊讀書目數行下文有豪氣不屑屑襲町畦耽吟詠詩騷古今體俱擅長屢爲宗匠所拔識兼通繪事梅竹尤冠絕一時肄業豫章書院所交盡知名士丐繪

者日踵門登壬午賢書兩赴春闈以未售咯血卒士林惜之
鮑啟倫字肇庭職監生性好義倡施棉衣獨力經理者十餘載
凡事有濟於邑如惜牛惜字建廟宇修橋路靡不樂從瀕危
囑子鍾瑞出金千餘襄建文昌廟併助資興歲辛卯壬辰邑
荐饑捐金倡督平糶皆承其志也

辛從益字謙受號筠谷進士以二甲傳臚改翰林院庶吉士散
館授編修充 國史館纂修嘉慶三年典試福建充 文淵
閣校理教習庶吉士辦理清秘堂事兼翰林院撰文遷江南
道御史疏請改順天鄉試章程巡視西倉疏駁刑部秋審悞
人五年陳請歸養承歡之暇惟以造就後進爲務服闋入都

十七年補河南道御史條陳吏役玩法蠹民七弊奉

旨通行轉掌四川道御史疏叅長蘆砮碼案奉

旨交留京大臣查覆尋巡視東城十八年兼署福建道御史值京畿

米價騰貴奉

旨發麥平糶實力稽核積弊胥捐并請區別囤積存賣之條得

旨分別辦理適有買米出城被門弁鞭傷致死者據實叅奏得

旨革審治罪從此城外細民不致乏食轉掌河南道御史旋升吏科

給事中條陳民間匿稅諸弊得

旨交部議行時三省大兵凱旋各路兵丁有擄掠被難子女者主帥
以收養無依入告具疏言此等幼孩因兵馬匆促暫致離散

兵過各有村落宗黨可歸請飭詢明籍貫居址發交地方官送歸本宗得

旨密交各路領兵大臣陸續資送回籍者不下萬餘丁口又以近科文風駁雜懷挾公行條陳正文體嚴搜檢得

旨所奏是十九年福建某縣令解餉入都書吏索費甚賒司員從中袒護延不收兌奏請嚴辦奉

旨會同刑部堂官審定司員及書吏論如法轉掌兵科給事中條陳浙江酒商盤剝運丁之弊并請復恩借舊例得

旨交浙撫查辦各省運丁因得邀恩借銀兩二十年升光祿寺少卿召見垂詢邪教事宜面奏正教昌明邪說自息宜責成司牧是日有

旨卽通行訓誡升通政使司叅議二十一年升內閣侍讀學士

簡放山東學政校士務嚴場規閱文一手評定士論翕然士類中有顯傷風化者繩以法其或守法陷入文網則必委曲愛護間與地方大吏反覆駁正最惡官吏凌虐士子有被捕役所辱者移臬司按辦有某令妄責諸生具摺叅奏奉

旨革審尤加意先賢遺址及後裔清釐宗聖書院匡扶有氏博士封禁蒲留仙墓道士風爲之一振二十四年升通政使司副使旋升光祿寺卿二十五年稽查東四旗覺羅官學道光元年擢太常寺卿一年升內閣學士兼禮部侍郎奉

派閱庶吉士散館心及新進士覆試卷時江西巡撫毓岱以推廣

社倉成法請令官給牙帖定爲衣物典穀條奏給帖之弊爲富民害者二爲貧民害者二奉

旨交巡撫閱看署撫遷就新撫阿霖奏明官理穀當事不可行宜聽民便遂停止奉

命赴陝西查辦案件渭南柳全璧挾財勢殺人知縣徐某受賕研訊得實以審官贓私入奏皆論如法奉

旨細心研鞫秉公持正可嘉之至又蒲城吳姓被衙役詐贓自盡富平某令與臨潼某令俱龍鍾闖冗及同州某守與所屬富戶結交借欠均奏參論如法陝西馬政之害歲爲民累復

命時力陳其弊奉

諭卽交新撫盧坤查辦三年充 文淵閣直閣事充武 殿試讀

卷官升禮部右侍郎時方修通禮與尙書汪廷珍悉心參訂多所更正兼署吏部右侍郎奉

命恭送

仁宗睿皇帝實錄

聖訓尊藏

盛京又奉

旨祇謁

三陵查看

陵寢工程監收歲租事畢轉禮部左侍郎

簡放江蘇學政使署在江陰向來薪米供應取給縣尹抵任峻卻
不受自出民價買之喜獎節孝裁革匾費并禁各學需索江
蘇賦額數倍他省官之浮收與士之索規交相爲病值河湖
交扼艱於重運地方官籌貼費杜索規奏立收漕章程從益
以法貴持平事期可久今明請浮收過絕上控必致浮益加
浮閭閻受害無窮具疏入告有

旨飭巡撫秉公辦理江蘇收生婦子孫攻訐者衆因申明僅業收
生未會驗姦者仍准捐考咨部區別照咨通行清復安東清
漣書院豐縣某令以控盜妄責生員移咨巡撫撤委訊辦一
切訓士閱文辦案杜弊視山東尤加謹焉七年補吏部右侍

郎十二月因病陳請開缺生平孝友性成父晚年癱瘓便溲
親滌每風日清朗必背負出外遊覽事母先意承志事仲兄
以師禮與夫睦嫻任郵罔不眞摯宦情素淡自館選居京師
貴要之門轍跡罕至惟日與翰苑諸公會課及士子以詩文
就正據直評改充鄉會試磨勘官者四恒以詩文爲樂習次
坦白無城府以和衷圖公事能屈已從善然遇非理之事輒
形於言色不爲權要屈承

今上溫諭人甚樸實無希冀亦無揣摩獲邀

特達之知爲學務適於用不喜空談性命聚書十餘萬卷公餘坐
對不暫釋自經史諸子及天文律算地理小學家言無不博

通爲文自達所見不拘拘摹古而筆力蒼重自與古會賦及駢體文俱大氣磅礴格律謹細詩學王右丞間法李義山晚喜杜韓書法宗顏魯公動必以正所著有詩集文集外集奏稿館課偶存公孫龍子注待梓卒年六十有九子桂雲候選訓導次師雲進士次辰雲舉人次鵬雲順天府經歷

辛朝俊字惠蒼號敬亭少聰俊喜讀書以試未售銳志仕途由川楚例報捐鹽大使補山東富國場場素疲設法調劑產鹽溢常額兼力剔私計上考捐升知縣以親老改發廣東委審積案多平反上官察其能揀署劇邑陽江到任革陋規偵訟師猾吏繩以法痛懲獷悍訟風頓息將及代適制軍百齡過

境士民以畱署籲請三載迺卸篆委丈順德香山互爭沙田劃地界清勘丈定賦額兩縣帖服隨制軍出洋捕盜擒獲烏十二審辦張保仔投誠被累脅者悉放釋署澳門同知慈韭自給却供帳洋賈拳轅羅拜署嘉應通判襄理郡案接署開建陽春電白所至清介自持以振興學校爲務題署長寧興廢舉墜尋補普寧見城內河道壅塞捐廉千金募夫疏濬不煩於民擢調新會日勤審理間搜積案賴申雪無算循聲較陽江尤著以親老告養歸侍奉喪葬悉盡敬盡哀服闋不復謁選時程中丞檄輯志乘邑侯衛委董捐輸挈百餘金以倡議建武廟首捐百金復邀同志構先代殿因文昌乏專祠出

金千餘借九人建如式旋議賓興合室捐二千餘金以助旣而陳邑侯謀疏河道捐金百餘與邑賢能集夫挑濬改舊堰爲石閘於邑公事實多利賴焉生平孝友睦婣俱出自天性嘗母病衣不解帶逾月友愛諸弟撫孤姪皆成立間外侮輒以一身肩之居心無城府坦白和平人樂近之遇親朋緩急極力賙給甚或稱貸以助佃戶有減租者莫不得其意以去從不計較財物雖宦途廿餘年歷官十一政卒不名一錢負債寧取償於家惟勇於爲義嘗念饑民待哺出粟八百石擬立義倉以事未諧易簣時猶諄囑其子卒年六十有七子輝兩候選訓導次輝漢候選鹽大使次輝祖分發山西候補典

史

唐錫鐸字廉持號松士幼失怙恃偕弟讀書家塾而性豪邁不屑屑經生業喜談宦績亟思建白值川楚教匪滋事援例報捐縣丞分發陝西時關右賊烽方熾人多裹足獨喜躍就道大府奇其材命馳赴漢中襄理軍務兼府照磨事改署南鄭青石關巡檢擒獲首逆苟朝九以其功上於

朝升褒城知縣政尙坦易惟遇豪右則懲儆之愛民如子民亦戴之如父母在任四載因 欽差需索站規案鑄級離任仍以擒首逆有功於同議十數員中

特旨開復誠異數也接署洋縣澄城俱有聲尋補興平到任革陋規

清介自持時瘟疫流行巡視民間疾苦捐給藥餌口糧不假胥吏手賴全活無算居常與民休息第循循拊勉不施鞭扑十載之中教化自成調任咸寧首邑捐廉濬龍洞渠得加級有兩大姓爭訟連年爲平其獄事後各餽千金爲壽峻拒弗納有富室某死以千金丐弔其喪堅弗往其操守端嚴爲同僚所推重擢留壩同知地介萬山中民少詩書不諳蠶桑利甫下車捐建留河書院并分設義學七區延名師督課教民植桑多者給予優獎又以其時勸民力學習禮讓禁嬉遊愷諭再三如家人子弟之相依偶西陲不靖大兵過境供帳籌備民若無事洵爲衝途所僅有爲人坦白和夷內行馳篤友

愛幼弟撫諸姪皆成立遇親友緩急無或吝故沾漑者不少仕陝三十餘年歷官七政廉而不苛明而不擾惟以農桑學校爲務以故百姓咸懷留壩士民於歿後請主入清官祠實不能忘其惠也卒年七十五以櫬歸葬子藻次若馨俱候選

縣丞

鄧醇字金和號古愚附貢生績學有聲居常恬靜人或侵侮不與爭性好施予歲飢兩次捐穀二百石以贍族鄰有窗友負逋甚感出橐金三十償之厥塘眞君祠乏香火貲助腴田四畝族有無力聘娶者悉完其配佃鄰某窘欲出妻贈金全其室途遇擔負告餒輒以錢給之俾得果腹而行凡邑公事隨

力贊成年老猶切觀光嘉慶辛酉鄉榜後

恩賞舉人乙丑會榜後

恩賞國子監學正卒年八十

李以正字守中號靜堂性醇恪冠軍遊庠貢名成均壹意敦善行砥礪廉隅爲亟睹大宗小宗祠頽挈金千餘倡新之慈溪白沙神山各橋圯無告募者次第揭貲創建旣而萬綏朱溪富山等橋均解橐以齎其成何洲贈渡環溪濟渴並捐田租間甃路平糶散藥施楫孜孜不少勸會四邑議移郡學邀族兄李珽合建大成門名宦鄉賢祠又獨建門樓砌甃牆佐郡人之力所不逮時鄭郡伯亦議擴試院邑人徇徠久之毅然

建亥棚并建大堂以壯觀瞻合郡義之邑建試棚武廟悉輸金以襄及五區起賓興慨捐腴田千餘把爲善後貲生平孝友家居風節自持不輕入城市勇於爲義估費不下萬金有奇大吏上其事於

朝旌表樂善好施發帑建坊道光元年

詔舉孝廉方正闔邑公舉以應

恩賜六品頂服優養林泉爲一邑矜式易簣時猶囑其子楨捐金二百貯粟救饑其善施之懷彌留不忘若此卒年七十九

湯薦馨字顯宗號馥堂幼聰穎肆力於學經傳子史靡不研究尤工制藝暮齡補諸生試輒高等先達成器之登戊寅賢書

以誘掖後進爲心凡經指授者作文有法度居常恂謹身若不勝衣訓及門必以忠孝廉讓謂士先器識而後文藝倡建龍岡書院培育區中子弟并籌鄉會贖費承父夙刊陰騭等書倡同志續刊航中帆翼道集以爲好善者勸意良殷也四上公車挑選教諭壬辰會試文已入彀因額遺旋歿京邸以觀歸士林惋惜

彙傳

劉貞號靜齋少孤母坐之膝授以孝經輒成誦壯益力學嘗於居西關靜樂軒士夫歌詠之晚名所居曰桐岡書屋積書以課諸子祭酒胡儼記其勝家傳有餘芳集子蓋進士另有傳王永誠性倜儻琴書自娛不樂仕進搆絲筠清室與易節郭瑾諸人觴詠其中觀察胡槩記之家藏有綠筠詩卷

袁秉清進城鄉人正統十二年有司勸出粟一千六百石給冠帶天順五年又勸出粟六百石立石

楊久瓊東都人正統十三年有司勸出粟一千六百石給冠帶彭希節東都人景泰四年有司勸出粟一千二百石旌表義門

周伸信西都人景泰四年輸粟一千二百石助賑旌表義門
龍志霖景泰七年出粟二千石助賑有司題旌

辛秉儀西都人成化三年有司勸出粟二百五十石給冠帶
龍時清龍時振東都人成化三年各出粟二百五十石俱給冠
帶

陳福榮白良人成化間歲饑出粟數百石運赴官倉賑濟申詳
題旌刻有碑記

龍大志成化二十二年歲凶出粟賑濟給冠帶

龍大寧奉例納粟備賑有司獎賞給冠帶

郭孜仁號洞山性逸宕不羈與邑士以詩倡和後薦召抵京擢

經歷不仕歸卒年九十二

李廷顯徵古後裔宏治間修龍河浮橋圯於水復改立渡又設
渡於林家磨并建水亭修竹潭橋及上峯矮陂石橋更鑿井
於山麓以濟渴者正德十四年舉鄉飲卒年九十六

龍尚茂字觀美正德間積粟數百石平糶濟荒知縣陸璫獎之
龍昇震奉例納粟備賑知縣顧獎給冠帶

彭本鑿號兩江家不豐而好施傾貲伐石就所居小水水口爲
橋工方舉會疾卒子遵教由貢生任紹興訓導遷襄陽教諭
卒成父志山陰太史諸大綬爲之記

龍郎嘉靖十九年歲凶出粟賑濟給冠帶表曰義士

高華縣志 卷二十一
宋一鳳因黃竹關所修雙虹橋久圯經知縣陳燦改修復壞捐
貲重修焉

鄧南春庠生屢試高等數奇不售晚年捐粟哺賑知縣劉舉鄉
飲給冠帶年八十餘卒

鄧南居嘉靖庚子辛丑游饑貧乏者出粟貸之屢捐貲爲人解
訟年九十六舉善民鄉飲十二次給冠帶

鮑彥聖號少泉庠生家故貧不務生殖嘗讀書夜歸遇巫驅疫
詢知爲某病出金贈之服膺涑水家訓鐫置座右子紹湯貢
生知墊江縣

龍濟亨性深沈有俠氣知縣周曾遭官謗挺身代雪一時稱奇
龍匡信性醇厚事繼母以孝聞知縣畢獎其隱德

王珪蘭樸雅篤實年八十七舉鄉飲給冠帶子覲敦倫恤族知
縣畢委督修城有功亦舉鄉飲不受

袁鉞字伯威里中有行好事者不吝董其成倡建牟村橋并勸
其姊節婦助金焉子女楫庠生捐修東樵書屋更名東井軒
延師開義館助貧士館穀多賴成立

宋福謙號柳潭性孝友知縣畢舉鄉飲子良翰篤學多題詠萬
厯歲貢未仕卒

辛光英篤行孝友隱居自適知縣畢舉鄉飲不赴子明韜字鳴
泉生平隱德如遺遺焚券諸事常不令人知居母喪年已七

十猶呱呱若嬰兒四舉鄉飲御史笄重光廉其良善特嘉優
獎年九十二卒

辛御典好善樂施人稱長者知縣舉獎以額年九十卒

王萬行以椽吏任鎮遠稅課使恪恭厥職院道獎異張璧贈有
詩卷

郭宏量字懷吾好行其德曾捐金爲友某娶妾延嗣修葺楊公
嶺路康樂兩河宜春秀江安福鳳林諸橋皆出金以助又倡
修宗祠卒年九十三

李耀芳萬曆年間買腴田二百餘把助學署縣吳額獎之

譚德宗庠生安貧苦守彭之龍宋九德輩雅重之

胥橋東都人性長厚嘗捐修高村石橋萬曆元年將近郭徐家

塘田七十餘畝并四圍山場概助學宮爲贍學之資院道獎

給冠帶

按舊志載半價入官今橋子孫照補半
價錢壹百貳拾千文以充公用因奉改

張桐號後峯宅心公平喜爲人解紛萬曆改元給冠帶年七十

四卒

彭池萬曆三年正月父蹕病危遇方僧指點割左手肉和藥進
之愈知縣徐申獎

辛曉鳳生平好義萬曆十六年災荒米價騰貴饑殍相枕藉慨

然曰何取有餘爲出粟三百五十石助賑院道獎異後舉鄉

飲

孫如琳萬曆十六年間游饑輸粟備賑鄉黨稱之

譚熈字德明幼習舉子業論時務得失洞悉窳會里中人有緩急竭蹶相赴萬曆丙子龍河橋圯於水獨力捐建己丑大稔券而求者差等授之穀貧不能償輒焚其券一夕鄰燬於火熈居且危迫忽風反而免臺使檄旌其門年九十六卒

龍匡仁庠生家饒於貲修橋葺路濟族賑鄰知縣鍾舉皆重之
丁顏八字爲甫萬曆二十二年父守忠久病不痊計無所出割左手肉熬湯進之愈地方呈縣申獎

鄧繼寵事繼母以孝聞爲人謹厚公平年九十七舉善民屢赴鄉飲六經按院獎賞

郭汝宣號慕塘事寡母及庶母以孝聞與庶弟並遊庠道府試更相第一兩中乙榜萬曆中貢成均嘗受知於知縣徐一唯後徐升任欲攜之遠遊以母老固辭友謀其母塋旁地庶弟欲聞諸官宣曰友既不義當與分咎尙未空穴幸也以貲補友所妄費事遂寢

郭維礪號南賓歲貢任贛州訓導矢志清刻制行莊嚴訓人以孝弟勤儉爲本

周名恭父母早亡撫幼弟如子事舂叔如父賑貧恤乏有古人風兩舉鄉飲

陳仲植好施予族鄰喪葬不及卽捐囊以助知縣陶給冠帶舉

鄉飲後修丁田橋助木石不計

鮑坎仔賣腐膳母萬厯三十八年母病危剖左股和藥愈院道
獎之

楊仕紳庠生割股救親知縣倫郡理伍交獎之

龍洪泰有善行月給多江渡募費葺水府廟構砥玉軒以課子
知縣倫獎之年七十卒

張汝術爲人忠厚有犯不核貸不責償年八十三知縣倫獎之
鮑燮急公好施知縣倫給冠帶舉鄉飲後助修丁田橋

辛明都字建和處族黨一以仁讓有不能婚者力爲完娶知縣
姚舉鄉飲不就

翟章積德好善捐修潭埠橋遇饑輸穀助賑三舉鄉飲壽近百
歲

周民蒸少通經籍山林寺觀多所題詠鄉里推爲亭老年八十
九卒

丁承坤年九十二知縣陶舉鄉飲給冠帶後督丁田橋功

辛可善號龍衢歲貢篤行好修知縣姚謁選時與遇京邸奇其
才訂交焉可善歸絕不干謁嘗送書於學助樹修丁田橋

郭宏翔醇謹慕義與物無忤萬厯中有侵其祖塋墓者廬其側
三年卒年七十三孫士佩歲貢

伍夢熊急公尚義修丁田橋與有力焉署縣張舉鄉飲

彭世懋字德開庠生嘗修翠巖書院集後臺砥礪其中尚義有俠氣士樂交之施棺修路傾貲不惜

喻應瑞號合川生平詩酒自娛賑饑砌橋築庵皆不吝會拾道旁遺金追而還之不受報知縣姚給冠帶年八十九卒

喻應禎號慕衢性好吟詠置義田修路平糶皆助焉知縣姚舉

鄉飲

周以銘值歲饑出穀以賑萬厯中督修康樂橋獨任一管二墩澄渡興江浮梁皆曾修葺

張顯庠生萬厯中修康樂橋獨任一管知縣姚舉鄉飲

張文儀泰昌元年母宋氏雙目掩瞳數迎醫不效文儀方童稚

慟泣額天願以身代割左股和藥母眼復明知縣姚題旌建坊

孫耀宗字文字年十二卽持齋見庵觀佛像頽壞橋路缺陷輒捐助修理人有貧不能娶者間鬻田助之年八十卒子希賢貢生任寧州學正

彭紹美字世濟幼孤撫弟倍篤性敏而有文屢弗售遂棄去以課子爲事長復古次式古皆以貢任教諭

彭天資庠生家無擔石儲高志自逸萬厯四十四年舉鄉飲給冠帶年八十四卒

陳曰俞父生員天表病危剖左股和藥進之旬日而愈時年方

幼親鄰欲舉報曰俞固不可遂寢彭自新爲作傳

楊綦號文麓歲貢生以孝友聞操行端莊士林欽之選南直休寧訓導未仕卒

周汝謨增生苦志潛修持身耿介年六十八卒

彭天贊以椽考任福建建寧主簿居官有聲在家修橋葺路歲饑多疫死者施棺瘞之并豎石亭於龍河渡林家磨爲行道憇息之所

彭應成由典吏授照磨自甘隱逸致政不仕居家奉法循禮

彭夢瑞萬曆四十六年十一月母冷氏雙目內障夢瑞齋戒七日封左股和藥母眼復明題旌入明史孝友傳

按明史作天

版年同誤

汪自霖字躍龍三歲失怙事母孝有田六千餘析產以多讓兄止取三分之一資膳養而已

龍宗海天啟二年母鄧氏病危遇醫執方書示以股肉可愈夜割股炊而進之幸延六年卒後事繼母辛氏如嫡知縣陳申獎孝行

龍九錫號榮所歲貢不仕貞介純謹苦志力學常自作水龍吟年八十六卒

郭萬嘉助棺賑饑壁還遺金邑稱善人

譚嘉憲家貧奉母以孝聞拮据教子幸有成立

張正亮賑饑修路葺梁知縣李舉鄉飲

歐陽啟桐崇禎四年同男侃四送杉木百株修學知縣韋明傑
額獎之

辛應象崇禎六年母彭氏病篤剖左股救痊次年復病再剖知
縣韋獎之

周樞生平樂善子遊庠早世依姪貢生周顯終其餘年崇禎八
年知縣韋儼申獎適卒年九十餘

敖奠華號如淵白良人課子勉學撥田山爲燈火費又撥田良
田六百餘把與甥選貢張日嘉爲讀書費爲從弟奠忠娶婦
延嗣捐修煙包西江易公凹黃田江暫駐亭五處橋梁及東

嶽祠海雲古刹知縣曾宜高額贈之孫璉舉人

彭以筐號紹塘推積施濟嘗結書屋桃花巖口延師訓子知縣
曾宜高舉鄉飲

聶興煥謹厚與物無忤濟乏施棺里中稱長者年八十八

鄧南春好施子捐穀備賑舉鄉飲

周卿邑庠生樂施廣濟兩舉鄉飲

譚飛龍有聲巽序亦兩舉鄉飲

張周勉兩舉鄉飲龍霄年九十五三舉鄉飲並稱善士

皇清

楊一龍少孤祖遇用課之讀詩文皆精贍教授生徒專事醇正

貧者悉爲曲成性介不容人過友朋敬憚如嚴師家雖貧恬如也

辛炤字元弼順治初歲貢知縣高鵬起甚重之嘗助土二丈創建文昌閣

辛明韜字鳴泉生平多隱德如還遺焚券諸事常不令人知年九十有二四舉鄉飲御史笄重光廉其良善特加優獎

劉應選字柱石世隸軍籍謹厚急公丁亥奇荒輸粟賑饑知縣高起鵬額獎之卒年八十一

譚經祺字謙夫性慈好善嘗渡江拾遺金主者將溺水輒還之丁亥奇荒備席以瘞餓孳子偃拔貢生

王試琦幼失怙事母以孝聞丁亥奇荒散粟給族全活多命年八十有六

郭一鳳字文徵性嚴正直聲著於時訓子姪以敦睦卒年八十
三孫邦藩歲貢任崇仁訓導

郭大章字孟爰邑庠生志行高潔知縣韋明傑目爲奇士年八十四爲族長諄諄勸誡咸受薰陶後舉鄉飲

龍璜字匪石邑庠生好讀書制行端方不入公庭教子孫以行
恕年八十猶應試弗倦

聞斯達字則兼邑廩生少廬父墓朝夕焚香祈母壽日記功過
著有周易講說

唐之舉字克允邑庠生性醇厚堂兄家貧給衣食二十餘年兄歿撫姪如子子開仕渾厚敦穆孫裕猷武舉

龍堯典字君則事寡母至孝接物愛敬有古人風

宋文芳字毓和家故貧事父母能如禮仲弟季弟欲異爨芳涕泣而止後析產取瘠推肥人皆賢之年七十有四卒

周煥字炳如庠生好讀書曠達自喜外甥敖璉甫二歲而孤煥教誨如己子璉亦依戀若父後璉申康熙壬子舉人

辛汝楫字以濟邑庠生事繼母得其歡心康熙戊午歲饑鄉鄰乏食者分粥給之多所延活卒年近九十

郭邦重字伯仲爲人醇樸貧能自守年踰八旬卒

劉世傑字漢臣邑庠生豪爽樂善歲饑捐囊買米賑濟全活甚衆年踰八十卒

郭士聲字公選西都人性剛介是非不少假借年九十六

鮑椿齡字俊年庠生以孝義聞母病痢椿齡妻躬廁媮姑愈而氏染疾卒椿齡年三十終身不續娶人勸之齡曰妻爲吾母死何得更娶年九十六歿

府志

汪世豐東都人以勤儉起家鄰里是非力爲排解待師尤敬年

八十六知縣何錫命龐驥額嘉之子廷獻歲貢生任訓導

易象乾西都人秉公仗義爲邑長所重年八十九

汪映昌字選元東都人性好學九十歲猶試童軍卒年九十七

郭士奇西都人少孤善事寡母刻苦自勵爲諸姪完娶年九十

三

易聯也東都人雍正元年溫上貴之亂陳輝玉嚴林森等率鄉

勇捕勦聯也捐餉穀三百碩事平知府李春芳額獎之

鄧興生拾生員郭邦績銀拾兩零三錢還之題旌建坊

龍芳二都人質醇厚好修橋賑乏課子期於有成年九十二

易宗聖東都人業縫衣幼失怙母有所嗜一一遂之母病危剖

左股和藥以進尋愈

以上俱舊志

胥振勲字首標庠生八歲通書史父喪哀毀如成人絕意科舉

業知縣劉體元遺書勗之答曰有郭外田足供饘粥以養親

不願仕也母歿廬墓三年

府志

辛金世字儀文孝友喜施父早歿長兄另巽遠居金世提攜二

弟不有私財乾隆癸亥春饑邀同志傾囊以賑活人甚夥知

縣嚴在昌以誼切維桑獎之

以下俱新輯

辛汝瀨字定遠歲貢生敦行力學喜周人困捐修道路若石岐

及牛角冲上下高田費三百餘金卒年八十七

龍喜齡東都人乾隆乙亥歲饑出粟減半價糶乙酉又饑流民

載道長子培次子琦又半價以糶儲粟不足乞糶以繼并煮

粥於家以濟貧不能糶者三月之久捐金七百有餘

辛金鱗字池飛年十五補弟子員事繼母以孝聞爲人好義癸

亥歲饑出穀數百石平糶知縣朱崧額獎之

易瓊字廷選監生讀書好義常以振興文教爲念邑中改建學宮形家言必得文筆拱對瓊慨捐七白金建塔南城外文風由是增盛道光年間其後裔重加修飾

辛廷臯字欽堂歲貢生學問深邃文章恬雅從游經其指授悉有法度遷建文廟出鄉勸捐入局經理無怠無私知府陳額獎之

聞廷佐字宏毅例貢生性慷慨乾隆癸未甲申乙酉連歲穀價昂廷佐謀於族出穀半價以濟復謀於邑有力者權其贏領縣倉不足復購鄰邑粟及雜糧佐之各坊一局凡十餘局設總局於學以待里氓賴全活無算子附貢生之詠有父風嘗捐田三百數十把爲族人授室資族多賴之

陳賢書字秀升監生乾隆乙酉歲大饑捐金四百與聞廷佐楊之洵等設局學中平糶又分局安仁坊書院獨司其事復就本祠與弟錦雲鳴鳳平糶積月多所全活

彭賢廣字韻洋邑廩生博學能文精於考据性至孝先是世母寡無子以賢廣爲之後事生母與所後母俱得歡心二母孀守爲請旌建坊爲人公平嚴正鄉里推重屢薦棘闈四十七歲卒著有藏山稿分宜林有席爲之序

辛金騏字鶴廷慷慨不吝施予乙酉歲饑減糶人賴以濟袁家

暇有貧鬻妻者輿在門矣召其夫予以金而全之生平見行不協義者據理直談無所阿曲

辛錦瑤號崑圃邑庠生縣舉爲學宮首事修文廟建考棚立育嬰會悉有力焉爲人解紛身未嘗涉訟卒時老母尙在遺命以孝服殮

辛標字中文庠生孝友出至性憫兄食指繁讓父產而多予之遇戚族告乏解橐以助歲饑倡族平糶間有婚娶乏力者出金完其配而自奉則甘儉約脫粟縵袍晏如也創祠宇置祀產及建城隍廟皆身任其勞次子炳席灑落有幹才工左手書於坊市族祠諸事能持正無瞻徇遇邑公事亦頗匡襄會

孫有猷舉人

鮑啓仁字子良監生慷慨好義倡立潭埠社倉賴以賑荒獅子橋圯捐募增修歲饑平糶及整治道路從未少吝捐金助祠增祀產俾後之拓祠建塾有所取資子震岡中武科忼爽有父風與歐陽德安倡建樂育義塾并獨建上潭堰開石圳農田賴以濟五世同堂上邀

旌典年九十卒

歐陽韶仁字德安爲人急公好義倡建潭埠樂育義塾并倡建合族義塾造就人材壘壘不倦念宗祠乏祀產重新大祠構支祠並置祭田歲遇荒歉設法平糶遠近賴之晚年值邑公

事力肩其任至顛踣風雪中負逋鬻償弗恤也士類賢之卒年八十

補遺

汪自東字二憲屢試高等以數奇老諸生生平尚義蠲貲周急時饒田鄉痘疹盛行嬰孩暴亡自東或濟湯藥或給食用獲全活甚眾咸稱爲廣濟先生至老抱病子會通刲股以進雖未獲痊猶延喘數日亦不忍父死之一念云

舊志

萬載縣志卷二十一

寓賢

自昔名賢足跡所經類足動人俯仰謹識之而不能忘覺名勝之區藉名流增色焉萬載古康樂地多佳山水搜奇領異者往往遲迴久之如文靖虞公文正吳公偶爾經過留題詩文其高風固可想已至若避地停車尋幽築室尤徵韻事之能留恍似前賢之復作撰寓賢志

周

藺相如懷舊鄉緬村里人幼孤長而豪俠仕趙爲上卿宅在邑西五十里藺家村藺灘今猶存藺姓者

舊志參洪武志

按蘭相如史載趙人舊志以爲邑人未知何據大抵沿徐
昇修縣治記而訛也記曰其產才代不乏人義烈慷慨有
若蘭相如風穎秀邁有若謝康樂使以蘭爲邑產將謝亦
邑產乎今攷相如故里在直隸磁州南二十里杜村店舊
有石坊又邯鄲城內有相如迴車巷其墓在陝西渭南縣
西四十五里戲河道旁碑尙存姑以舊志所有存爲流寓

晉

習鑿齒字彥威襄陽人爲桓溫別駕晉末秦苻堅寇陷襄陽避
地於邑之山谷誦讀不輟後人遂名所居之山爲書堂山

舊志參通志

按習襄陽郡志載其避苻堅居萬載卒葬分宜棗木山輿
地志亦云分宜有習墓攷晉史苻堅陷襄陽聞鑿齒名輿
致之俄以疾歸襄陽尋而襄鄧反正朝廷欲徵鑿齒使典
國史會卒不果據此無避地事墓當在襄陽王仁圃江西
考古錄辨正甚明因相傳已久仍舊存之

唐

陶沔竹溪六逸之一爲唐司空晚歲遊邑東北村落愛其山水
遂居焉巖稱陶逸卒後鄉人立廟祀之稱陶司空廟子孫世
居其地號陶家坊

舊志參通志

柳希玘蘇州刺史父渾刺袁州有治聲朱泚反聞其名欲致之

因務掠其子公爲渾季子避居本邑之西江遂家焉卒葬下

阮大墓山舊志參通志

徐延休字德文世爲會稽人唐乾符中進士昭宗狩石門無學士草詔延休來調官適在旁近逆旅左右言其工文辭卽召見命視草昭宗善之及還長安不得用樞密使蔣元暉辟爲僚佐延休惡其人棄去依鍾傳家於洪州烈祖時取江西得延休歸授義興縣令累官至光祿卿江都少尹卒二子鉉錯有傳節十國春秋補

按南唐書宋史載二徐爲廣陵人通鑑長編稱萬載徐鉉安志亦云鉉萬載人洪武志確指爲歐桂東鄉舊志福慶坊有鉉讀書故址則此所云依鍾傳家洪州者特統言之耳其實徐之家萬自延休始也故採入

宋

黃庭堅號山谷分寧人伯兄大臨令萍鄉崇寧元年庭堅航荆江畧洞庭涉修水經七十二度省大臨於萍鄉三月路經萬載宿逍遙觀廣慧道場卽崇信寺俱有題咏淹連數日而去采山

谷集補

甘禩奉新人爲衡陽縣丞紹興中金人復陷洪州遂卜居於萬以耕讀爲本以孝悌爲先采甘汝來文集補

辛竭字克勤號南坡擢宣後避難隆興喜恬靜結廬西山之隅

閉戶讀書以存心養性爲本以格物致知爲功隆興守聘爲山長生徒至者百數嘉定間歸省祖瑩遂定居焉子三英勇冠勇無傳英冠子孫繁衍

元

虞集字伯生撫州人宋丞相虞允文五世孫累官奎章閣學士至元五年過袁州作尊經閣記與邑人黃璧爲姻黨屢至其家爲黃盅作大本堂記併書澄波堂記後及馮侯修學記張

巖書院記

采學古錄補

吳澄字幼安崇仁人用力聖賢之學累官翰林學士泰定元年移疾去詔加資善大夫邑人黃盅曾受學於澄澄以孫女妻

之往來萬載寓盅家爲題其堂曰大本作黃璧尙古堂記

采

草廬集補

歐陽元字原功號圭齋其先分宜人祖遷瀏陽元魁湖廣鄉貢進士及第歷官翰林承旨與邑人黃璧友善嘗過萬載屢造其堂敘契濶見璧弟盅如舊相識歎其學不偏於言語訓釋之末爲教玉溪作錦江橋記

采舊藝文志補

揭傒斯字曼碩龍興富州人元大德間擢奎章閣授經郎元統初遷翰林待制集賢學士嘗偕吳澄虞集歐陽元訪邑人黃璧每欵洽經旬月而後去至今其坊稱集賢云

采舊地輿志

補

譚觀字自廣南昌灣溪人性孝友工詩文元至順間詔設辟舉科公卿薦爲經筵簡討賜進士出身授翰林院國史編修轉國子助教見陳友諒據江西諸路兵起避居萬載卜築龍河之濱自號臥遊子著樂隱詩以自適後裔世居龍河橋畔

舊志

鮑遇字千泗徽州人爲西臺御史與學士歐陽元友善時元主以鐵木迭兒輔導東宮上書劾之不納遂乞休家居後徐壽輝起兵陷池州乃徙信州兵又攻信州復徙瀏陽蓋欲依附歐陽元也值元物故徙萬載西郊燕子窩督耕種爲業子德忠遂家於萬

舊志

胡泰字志同奉新人善真草書能詩文元末任上高教諭既而避亂袁州洪武初徵不起日與劉豫父輩作詩文書畫以自娛知縣黃權嘗寄詩曰相別未多日相尋勞夢思更求四幅字要寫五言詩後遊覽至邑涂泉結廬其上名曰雲松巢石門梁寅記并作歌

舊志

皇清

史大成浙江寧波人順治乙未一甲第一進士素與瀏陽知縣韓燦萬載知縣范廷鳳相友善康熙四年訪韓至瀏陽旋自瀏陽過萬載途中有澗斷危橋度峯迴遠徑通之句至縣寓范署中有贈范令詩

采舊藝文志補

熊頤清江人初字養吉後改養及與彭士望黃尚賓友善以風節相敦勵年四十從寧都魏冰叔學旋客四方至萬載遊湖溪主李維則家有題大智寺古柏詩

采清江志補

董騰蛟字瀾躍號嘯坡福建人喜周覽名勝幕京邸復幕嶺南並有聲雍正甲辰遊萬邑南郊得觀音洞遂闢數椽以居名曰綠野園作洞景十韻人目爲董高士有引玉集福建進士聶奕隆爲之序學博袁繼輅作遊觀音洞記

采引玉集補